

JUDEUYŪ BEAPTUP CARTADUP

¹ Kuy bima juk adi Deus jekawēn muwēnuwēn'ukayū o'ḡudodot ipi kay jekawēn muwēn ām wuydobuyū'ūm'ūm pe—Judeuyū be—kuyje itabucayū be. Soat pucet ḡu o'ḡuwēn jekawēn—i'in ā. Ade em ma juk adi o'ḡuwēnuwēn cebe ip. Wara'at taḡtaḡtaḡ ma o'ḡuwēnuwēn cebe ip. ² Ḡasū bit jekpot ma o'ḡudot wuykay jekawēn muwēn ām wuywebe. Jekpot eju Deus soat o'ḡuḡē—ipi, kabi dak. Jekpot eju dak koato o'ḡuweḡūn, ihi dak. Ixe juk jekpot o'taē soat kukukan—ipi juayū kukukan, kabi beayū kukukan tak. ³ Deus idipap co'i ipot tak idip. Deus a'ōbuyxi jo'i ma ixe dak ya'ōbuyxi. Deus co'i ma ipot tak. Ixe a'ōbi soat opop jemuy muyap pe—kabi daḡat, ipi daḡat tak, ixe ya'ōbaca buye. Ikērēat o'ju'uk soat pewi ipi juayū bewi. Soat taḡ ip o'ḡuisun. Imuisun ip puje, oabik Deus xe kabi be. Oabik Deus aḡuywaḡōm soat kukukan. Ixe Deus soat podi ma ja'ōbacaap kuḡ.

⁴ Deus jekpot o'jomuy jekawēn tojtjtot'ukayū bodiam ya'ōbacaam. O'jomuy ya'ōbuyxiam kabi bewi ajēmjēmāyū bodi ma. Jesus Deus ipot. Imēnpuye:

— Jesus putet soat putet podi ma ibutetpuyxi — i'e'em Deus soat pe wuywebe.

⁵ — Ēn okpot. Ōn ma ebay oce ḡasū — i juk o'e Deus jekawēn tojtjtot'ukayū be ḡu—jekpot pe acā.

Waram pima:

— Ōn ma ebay oce, okpot ece'e — i juk o'e Deus jekawēn tojtjtot'ukayū be ḡu—jekpot pe acā.

⁶ Deus jekpot mudon pima ipi kay, koapat osunuyiat mudon pima:

— Soat wekawën tojtjot'ukayũ juy je'e okpot pe “Ën xipat cĩcã ocewebe,” i — io'e Deus soat pe.

⁷Jekawën tojtjot'ukayũ muwënuwën pima:

— Wekawën tojtjot'ukayũ mujujum òn kabido jo'i. Wa'òbuywatwat'ukayũ mujujum òn daxae jo'i — i'e'em Deus.

⁸Imënpit:

— Deus, ën ma soat tağacat kukukan ecesũy — i'e'em Deus jekpot pe. — Ën soat kukukat iap i'ũm ġu. Cũğ ma ixeyũ kukukan ecesũy — i'e'em cebe—jekpot pe. ⁹Ajo cũğ ma iap kay jĩjã ën, i. Ajo ikërëat iap kay bit etakoma, i. Imëneju kuy juk òn enaë soat tağacayũ kukukan, i. Deus òn, i. Ebay òn, i. Kuy juk òn emuy ebureyũ bodi ma a'òbuyxian, i.

Imënpuye ecokcok cĩcã, i.

Imën Deus jekpot muwënuwën o'e.

¹⁰Imëntak jekpot o'ğuwën: Kariwa, ka'ũmğũ bima ën cuk adi ipi eğugë, i. Ebum ma juk adi kabi eğugë, i.

¹¹Ipi i'ũm, kabi dak i'ũm ma, i. Ën pit ece'ũm ġu, i. Soat em ma ën pit etabëğ ecesũy, io'e Deus jekpot pe, i. Ipi iokok je'e, kabi dak. Wuydoti iokokat puxim je'e ip, i. ¹²Wuydoti mu'adabocap puxim ipi eceğũ'adabot, kabi dak, i. Wuyju wuydoti iokokat xixxiğ iisuat pu am, i. Imënpuxim wara'at eipi eceğugë ijop eipi dieğ, i. Kabi dak wara'at ma eceğugë ijop tieğ kabi dieğ, i. Jajoren ġu ën pit. Ibit ma ecesũy soat em ma, i.

Imën Deus o'e jekpot muwënuwën.

¹³Ekay itakomaayũ a'òbacaap oğũ'ũm, i. Kũyjobin jeedop ip a'ò kay, i. Ën ixeyũ kukukan e'emap wiwim pima oxo mabuk ecesũy, i. Xik'i juy eğuy oxo, i.

Imën Deus o'e jekawën tojtjot'ukayũ be ġu—jekpot pe acã. Pũğ em tak o'e ġu ma jekawën tojtjot'ukayũ

be. ¹⁴ Cekawēn tojtjot'ukayū ibiōḡbuk acā—kabi bewi ajēmjēmayū. Soat ip kapikpiḡ Deuſ peam. Deuſ ixeyū mujujom ḡuyjom taxijo'iaiyū buywacam.

2

¹ Imēneju wuyetabun cīcā juy ajop iboap ekawēn kay wuyetabucap epereap puxim. Kuy bima juk adi kawēn icēmat aya'ijojo. Iboap ekawēn kay wuyetabucap epere buje bit, warēmtaḡ ma kuka ajeku kobe o'jenapōniat puxim—uhuiat puxim. ² Deuſ ekawēn tojtjot'ukayū juk adi cekawēn o'ḡuwēnuwēn kuyje—kabi bewi ajēmjēmayū. Ixeyū ekawēn icēmat.

— Kūyjobin cuy epesop ixeyū ekawēn kay — i juk o'e Deuſ kuyjeayū be.

Imēnpuye Deuſ ipiat o'supi'ajojoat jekawēn kay kūyjobit'ūmayū be kūyjobit'ūmapteim. Ipiat o'supi'ajojoat jekawēn mupubutbut'ukayū be dak jekawēn mupubutbutcapteim. ³ Apēn Deuſ wuydaxijojom iap soat podi ma idip. Wuybu'u ixē be wuydaxijoan pima bit, wuyenapōn pa'ore acē'e ipiatpi'ajoap puxim. Wuykukukat Jeſuſ koap ma o'e:

— Eyetabun pima, Deuſ jeydaxijo — i.

ḡuyjom ixē ekawēn coco'ukayū kuy juk cekawēn o'ḡuwēn wuywebe.

— Icēmān xeku e'em eywebe — i juk o'e ip wuywebe.

⁴ Deuſ tak o'e wuywebe:

— Icēmān ip wekawēn muwēnuwēn eywebe — i.

Ixe ja'ōbacaap o'jomōḡmōḡ cebe ip—jekawēn coco'ukayū be. Imēnpuye Deuſ a'ōbacaap o'ḡubapukpuk ip adeayū etabun. Wuywebe i'e ba'oreat o'ḡubapukpuk ip adeayū etabun. Ka'ūma ma buk ajojojoiat tak o'ḡubapukpuk ip Deuſ a'ōbi. Deuſ jekpiwatpi ma jebiōḡbuk emumuūm o'ḡu'ē'ē'ē cebe ip. Ibiōḡbuk xipacat emumuūm o'ḡu'ē'ē'ē.

⁵ Ĝuyjom Deus wara'at ma ipi ĝuĝe iisuat. Ibo eipim omuyku iap muwēnuwēn oceju eywebe.

— Eyju ma ipi iisuat kukayūm epesop — io'e Deus jekawēn tojtjt'ukayū be ĝu—jebekitkit pe acā. ⁶ Imēn e'em Deus ekawēntup:

Deus, soat em ěn ĝebum ijodiacat kay, yopīt ma'ĝu ip, i. Ya'ōbuyxi ĝu ip, i. Inaka ěn cekay ip aĝ, i. ⁷ Deus, kuy juk ipi juacayū ejomuy ekawēn tojtjt'ukayū josū'iaiyūm, i. Darem ma ip jeedop ixeyū josū'iaiyūm, i. Kuy juk ixeyū ejomuy idipap kukayūm ipi kukukat puxim, ya'ōbuyxiayūm tak, i. ⁸ Ixeyū be juk a'ōbacaap eĝūm soat taĝacat kukayūm, i.

Imēn e'em Deus ekawēntup.

— Soat taĝacat kukayūm jeedop ip webekitkit — io'e Deus ibodup pe.

Ĝasū bit ijodiat soat ĝu ikukukan—Deus emumuĝe kukukan. Ixeyū soat kukukan iap ma ajojojo ĝu buk. ⁹ Jesus pit kuy ajojojo. Deus xe ikukpin cīcā osodop ip ipi juacayū. Imēnpuye Deus Jesus o'jomuy jekawēn tojtjt'ukayū josū'ian. Darem ma osunuy ixeyū josū'ian ĝuyjom je'ū ām soat peam ipi juayū beam. Ĝasū bit ka'ūmĝu Jesus co'iat ya'ōbuyxiat. Ka'ūmĝu ixē jo'iat idipat. Ka'ūmĝu ixē jo'iat, ixē oe'ū soat peam puye. ¹⁰ Deus a'ōbi soat kake ipi daĝacat, kabi daĝacat tak. Soat kake ixē dipap mubapuk am soat pe. Ixē ibikuy jījā soat jebekitkit pe jedipap kuk am.

— Okpot pe ipiat'ajo buje acā ipi juacat taxiĝo but je'e — io'e Deus jewebe ma.

Imēnpuye ibikuy osunuy ipiatpi'ajoan jekpot pe. E mukacūĝcūĝat puxim Jesus cucum koap kabi kay jemu-daxijojoyū wap. Ipi juacayū kukukayūm jeedop ip Jesus eju ixē emudaxijojoyū.

¹¹ Ixe Jesus ikērēat uk'uḡ ijodiacat pewi. Imuisusun ip. Ixe ebay cemumuisunyū ebay dak. Pūḡ ma ixeyū ebayat. Imēnpuye Jesus isūsūn ḡu “Eyju okitpitpiyū” i'e am ijodiacayū be, jemumuisunyū be. ¹² Imēn e'em Deus ekawēntup:

Bay, jemuwēn ōn okitpitpiyū be, i'e'em Deus pe. Ēn soat podi ma a'ōbaca iam jebibododon oce a'ōkayayū be wa'ījo am, i.

¹³ Wara'atup e'em:

Ōn pit wetabut oce cekay, i'e'em ixē. Ijoce ma ōn webekitkit kuḡēn ma juk eḡūm owebeiayū kuḡ, i dak e'em ixē Deus pe.

¹⁴ Deus ebekitkiyū ijodiacayū ijebit taḡ toyteyayū. Imēnpuye Jesus tak ijodian o'e cebuxim ip. Ipi juan o'e ḡuyjom je'ū ām. Oe'ū ibiōḡbuk kērēayū kukukat a'ōbacaap mu'ūm ām. Ibiōḡbuk kērēayū kukukat wuy'ūap mupararurun. ¹⁵ Tei'ūma kapikipik'ukat iparara jījā jekariwa buxim iap puxim wuyju dak wuyparara wuye'ūap puxim. Jesus pit oe'ū wuypararap mu'ūm ām. ¹⁶ Jesus ipi juan o'e Deus ekawēn tojtjot'ukat taxijo am ḡu—Abraão naxeḡebitbit taxijo am acā. Imēntak e'em Deus ekawēntup. ¹⁷ Jesus kuy juk jekitpitpiyū buximan o'e Deus bikuyap taḡ. Ixeyū buximan o'e cekay ip aḡ am paī yoboḡat puxim. Ixeyū buximan o'e xipan ixeyū kuk am, cedaḡ ma kapik am Deus peam tak. Ixeyū buximan o'e Deus pe ikērēat'ukan ixeyū bewi. ¹⁸ Jesus ipiat o'supi'ajojo wuybuxim. Satanás te'e ma ikērēat muḡēap ojuy osunuy Jesus pe, wuywebe ikērēat muḡēap ojuy buxim. Imēnpuye ixē itaybit wuybuywat am Satanás ikērēat muḡēap ojuy wuywebe bima.

3

¹ Okitpitpiyū, ḡebum cuy epesop Jesus kay. Eyju

okitpitpiyũ wuyetabut Jesus kay buye. Wuyetabucap muwẽnuwẽn wuyju warara'acayũ be. Deus cuk wuynaẽ jebekitkiyũm. Deus Jesus cuk o'taẽ wuyepaĩ yoboğan. Imẽneju Jesus kay juy ġebum epesop. ² Deus cuk ixẽ o'taẽ jebekitkiyũ kay aġ am. O'taẽ jebekitkiyũ epaĩm yoboğan. Jesus cedaġ ma jekapikap kuġ osunuy ixeyũ kay aġ. Ixe buxim Moisés dak cedaġ ma jekapikap kuġ osunuy Deus ebekitkiyũ kay aġ. ³ Uk'a muymuyat uk'a beayũ bodi ma ya'õbuyxi. Imẽnpuxim Jesus ya'õbuyxi Moisés bodi ma. Imẽnpuye cedaġ cĩcã wuywebe kũyjobit am Jesus a'õ kay Moisés a'õ kayap podi ma. ⁴ Soat uk'a ijodiat emuamuy'a. Soat pit Deus emumuġẽ. ⁵ Moisés cedaġ ma osunuy jekapikap kuġ. Cedaġ ma osunuy Deus ebekitkiyũ kuġ. Jekpiwan ma kapikpik'uk osunuy. Apẽn Deus je'e ġuyjom iap muwẽnuwẽn'uk osunuy cebe ip Moisés ma. ⁶ Cristo bit Deus ipot. Deus ebekitkit kukukat ixẽ—wuykukukat. Ixe cedaġ ma wuykuġ. Wuya'õca e'em pima, cebekitkiyũm acesop. Wuycokcoġ ma soat em Deus xe acesop iap wiwim pima dak.

⁷ Imẽn kuyjeat e'em Deus biõġbuk a'õbi: Ğasũ eywebe Deus a'ijo buje, ⁸ Kũyjobin cuy epesop ixẽ a'õ kay, i. Kũyjobit'ũm cĩcã osodop ip Deus a'õ kay eydobyũ'ũm'ũm, i. Ya'õ kay ġu ip o'e, i. Uk'a'ũmat taġ jekukum pima, “Wuyju ikẽrẽat muġẽġẽm pima dak, Deus ideida ġu wuywebe,” i te'e ma o'e ip Deus puyxijjom, i.

⁹ Quarenta koato bun wa'õbacaap mubapukpuk'uk oġuy itabutpe ip, i'e'em Deus, i.

Imẽnpit “Xipan ġu ěn ocekuġ,” i napa ma e'e'uk osodop ip owebe eydobyũ'ũm'ũm, i.

“Oceju ikẽrẽat muġẽġẽm pima dak ěn ideida ġu ocewebe,” i napa ma e'e'uk osodop ip owebe obuyxi-jjom, i'e'em Deus, i. ¹⁰ Imẽneju wetakoma jĩjã juk adi

oce cekay ip, io'e Deus, i. Ikērēat kay acã ip osodop jewağuyğuy, i'e'em Deus, i. Itaybit ğu ip osodop oem, i.
¹¹ Imēneju wetakoma jījā juk adi oce cekay ip, i. “Jeōm ğu ip okay jebodoy am—pūğ tak ka'ūma ma,” i juk oce owebe ma wetakomaap pibun, i.

Imēn Deus e'em.

¹² Okitpitpiyū, eyday'em'um cuy epesop eyewewekay eywebe eyetabucap epereap puxim! Deus kay eybu'u bima soat em itaicat kay, ikērēat kay acã juy epesop ğebum. Eyetabut ğu epesop cekay. Warara'acat a'ō kay acã epesop kūyjobit. Ixe a'ō kay bit kūyjobit ğu epesop. ¹³ Soat kabia jewa'ōmucanucan cuy epesop eyewemuğuykukuap puxim ikērēat muğēap puxim tak; eyetabut'ūmap puxim tak; eybu'uap puxim tak Deus kay.

— Ğasū ma kūyjobin cuy epesop — i juk o'e Deus wuydobyū'ūm'ūm pe.

— Ğasū — i'e'em Deus wuywebe dak.

Wuywebe “ğasū” i'e'em pima, jewa'ōmucanucan cuy epesop eywebe eyetabucap epereap puxim.
¹⁴ Wuyetabun'isum cuk adi wuyetabut cīcã ajop Cristo kay. Ixe kay wuyetabucap epere'ūm pima ixē bureyūm acesop.

¹⁵ Imēn e'em Deus ekawēntup: Ğasū eywebe Deus a'ījo buje, kūyjobin cuy epesop ixē a'ō kay, i. Eydobyū'ūm'ūm puxim ğu juy epesop kūyjobit'ūmap kuğ, i.

¹⁶ Deus a'ō o'ya'ījojo ip Egito eipi bewi Moisés emumujemyū. Inaka kūyjobit'ūm cīcã osodop ip ya'ō kay. Oibu'un ip cekay. ¹⁷ Ibun cīcã Deus itakoma osunuy cekay ip—40 koato bun. Itakoma osunuy ikērēat murūğrūğ'ukayū kay, uk'a'ūmat tağ oe'ū'ū'iyū kay.

¹⁸ — Ka'ūma'in ma ey'in jeōm okay jebodoy am — i juk o'e Deus cebe ip—kūyjobit'ūmayū be.

¹⁹ Iměneju wuyetaybit iõm pa'ore o'e cebe ip Deus o'ğuwěn ipi iat eipi be, itabut'ũm ip puye iam.

4

¹ Deus kuy juk o'jewa'õmudot wuykay.

— Epeõm cuy okay jebodoy am — i juk o'e wuywebe.

Wuyday'em'um cuy ajop wuyewewekay kũyjobit'ũmap puxim—wuyõm'ũmap puxim cekay. ² Wuyju dak kuy kawěn idipat aya'ĩjojo apěn wuydobuyũ'ũm'ũm o'ya'ĩjojo iap puxim. Deus ekawěn o'ya'ĩjojo ip. Iměnpit te'e ma o'ya'ĩjojo ip itabut'ũm puye. ³ Wuyju bit wuyetabut. Iměnpuye aceõm Deus kay jebodoy am. Iměn cuk Deus o'e:

Wetakoma juk adi oğuy cekay ip, i “Jeõm ģu ip jebodoy am oxe,” i juk oce owebe ma wetakomaap pibun, i.

Ipi muğē buje, Deus jekapikap o'jepere. Inaka:

— Jeõm ģu ip jebodoy am oxe — i juk o'e ixeyũ muwěnuwěn—kũyjobit'ũmayũ muwěnuwěn.

⁴ Iměn e'em Deus ekawěntup:

Seis kabia kap puje, Deus o'jebodoy jekapikap epere buje, i.

⁵ Waram pima dak iměn ma o'e: — Jeõm ģu ip jebodoy am oxe—pũğ tak jeõm ģu — i.

⁶ Koap kawěn idipat o'ya'ĩjojo'iaiyũ oõm ģu jebodoy am Deus xe itabut'ũm ip puye. Iměnpuye warara'acayũ jeõm jebodoy am cexe.

⁷ — Ğasũ ma kũyjobin cuy epesop — i juk o'e Deus Moisés ebekitkiyũ be—uk'a'ũmat tağ jekuku'ukayũ be. Iměnpit kũyjobit'ũm osodop ip. Iměnpuye ade koato kap puje Deus wara'at kabia o'ğuweğũn warara'acat mukũyjobinap ojuy.

— Ğasũ bit cuy kũyjobin epesop — i ģuto o'e waram warara'acayũ be—Davi ebekitkiyũ be.

Davi dak iboap ma o'ġuwēn Deus a'ōbi jebekitkit pe. Imēn e'em Davi emudupmubararaktup:

Deus a'ġjo buje, kūyjobin cuy epesop ya'ō kay, i.

⁸ Josué Deus ebekitkit o'tujuōm ġu jebodoy am Deus xe. Josué be ixeyū dujuōm puje, Deus kuka juk wara'at kabia o'ġuweġūn ġu ixeyū ōmap kabiam. ⁹ Imēneju:

— Epeōm cuy jebodoy am oxe — i mabuk e'em Deus jebekitkit pe.

Cebodoy but cebe ip apēn seis kabia kap puje Deus o'jebodoy iap puxim. ¹⁰ Jebodoy am Deus xe wuyōm puje, wuyju dak wuyekapikap acejepere apēn Deus jekapikap o'jepere iap puxim.

¹¹⁻¹³ Ġa'a juy aōm cekay. Soan cuy ace wuyebodoy am Deus xe! Deus ekawēn itaicat puxim, ya'ōbacaat puxim tak. Pajam soat takatkan wuyju—xepxep kadi tūybiban. Pajam wuyju iēn'uk'uġ tao bewi. Taobapuk e'em wuyxe iēn'uk puje. Deus ekawēn paja buxim—xepxep kadi tūybibiap puxim. Deus ekawēn co buje, apēn wuyju jewaġuyġuy iap ibapuk e'em wuyxe, apēn wuybikuy iap tak. Soat imunēm pa'ore bit Deus pe ijo'ūmap puxim. Soat ibapuk cīcā cexe cemumuġēġēyū. Ixe soat cocom. Ixe wuyekukuap cocom, wuyaġuy jojom tak. Ixe be acā apēn cuk adi ajekukukuiap aceġuwēn. Imēneju wuydobuyū'ūm'ūm puxim ġu juy ajop! Kūyjobin cuy ajop Deus xe wuyōm'ūmap puxim.

¹⁴ Imēneju wuybu'um ġu juy ajop wuyetabut am Jesus kay. Wuyetabucap muwēnuwēn wuyju warara'acayū be. Jesus ma aġ wuykay paī yoboġat puxim. Ixe wuyepāī paīyū kukukat puxim—Judeuyū epaīyū kukukat puxim. Ixe Deus ipot. Warara'acayū paīyūbodi ma ixē ya'ōbuyxi. Ixe kuy oajēm Deus topabe kabi be. Ixe kawēnwēn Deus eju wuywebeam. Imēneju wuybu'um ġu juy ajop wuyetabut am ixē kay. Wuyetabun cīcā ma juy ajop!

¹⁵ Wuyepaĩ ya'õpuruḡ ḡu wuykuḡ, wuya'õbaca ḡu ma'ḡu wuyju. Ya'õdidin ma wuykuḡ. Itabotaidabotbot wuykay, wuya'õbaca ḡu ma'ḡu. Satanás wuywebe ikêrêat muḡêat ojuy soat em. Te'e ma Jesus pe dak ikêrêat muḡêat ojuy osunuy. Ixe bit ikêrêat o'ḡuḡê ḡu—pũḡ em tak ka'ũma ma. ¹⁶ Imênpuye wuysũsũn ḡu juy ajop kawên âm Jesus eju. Soat cuy aḡuwên cebe. Ixe wuykay jĩjã. Ixe soat em wuykuḡ xipan. Itabotaidabotbot wuykay. Wuya'õbaca'ũm pima, ixe soat em ma wuybuywatwan jeenuy.

5

¹ Wuyju paĩ yoboḡat taêhêm ijodiacat parakpewi. Deus a'õbi kapikpiḡ ip jebekitkiyũ buywatwan. Ijodiacat emu-muũm ũmũm ip Deus pe. Deus etabutpe wũnca ên mupikupiḡ tak ip Deus pe ikêrêat uk am wũnca iwat pewi. ² Ya'õbaca ḡu paĩyũ dak. Imênpuye ya'õpuruḡ ḡu ip jebekitkiyũ kuḡ—jetaybit'ũmap tomuju ikêrêat mujurũḡrũḡ'ukayũ kuḡ—warêmtaḡ jekuku'ukayũ kuḡ. Yukpiceḡê ḡu ip ikuḡ. Ya'õdidin ma ip ikuḡ. ³ Ya'õbaca ḡu paĩyũ dak. Imênpuye Deus etabutpe ip wũnca mupikupiḡ Deus pe ikêrêat uk am jebekitkiyũ bewi ã ḡu—jewebewi dak. ⁴ Ijodiat jewenaêhêm ḡu paĩ yoboḡan e'em ip. Imên kuyje Deus Arão o'taê paĩ yoboḡan.

⁵ Imênpuxim Cristo dak jekpiwatpi ḡu o'jewenaê paĩ yoboḡan je'e am. Deus ma ixe o'taê.

— Ên okpot. Õn ma ebay oce ḡasũ — i juk o'e Deus cebe.

⁶ Imênpuxim wara'atup e'em Deus ekawêntup:

Ên cuy soat em paĩm eḡuy apên Melquisedeque paĩ osunuy iap puxim, i.

⁷ Ipi ju bima Jesus kawênwên'uk osunuynuy Deus eju.

— Odaxijom cuy ece — i juk o'e cebe.

Ya'öberen o'jewāwā cekay jetadi eju. Ibikuy bima iba'ore ġu kuka juk o'e Deus pe Jesus daxijo am ce'ūap puxim. Jesus yoboğan pin ġu osunuy. Jemucokcok pin ġu osunuy—jebay mucokcok pin acā. Kūyjobit osunuy Deus a'ō kay. Imēneju soat em Deus ixē ekawēn o'jojo. ⁸ Jesus Deus ipot osunuy. Inaka ipiat'ajojoap tağ ma oitaybitbin kūyjobit am Deus a'ō kay iam. ⁹ Jesus ikērēat kuğ ġu. Iisu soat tağ. Imēnpuye:

— Ewebe acā ipi watwat daxijo but — i juk o'e Deus cebe. Imēnpuye Jesus acā kūyjobicayū daxijojom—ipi juacat taxijojom. Soat em Deus xe jeedop ip itait cemu-daxijojoyū.

¹⁰ — Ēn acā paī yoboğan eğuy—ipi juacat kay ağ am — i juk o'e Deus Jesus pe. — Apēn Melquisedeque paī osunuy iap puxim ěn tak eğuy paī yoboğan — io'e Deus cebe.

¹¹ Soat ma'ğū oceju eymutaybin ojuy apēn Jesus Cristo wuyepaī e'em iam. Imēnpit iba'ore ocewebe soan eymutaybit am eyetaybin wa'ūm cīcā buye kawēn iba'arēmān. ¹² Kuy bima ma juk eyetabut epesop Cristo kay. Imēnpuye cūğ ma kuka o'e eywebe ma itabun'isuayū mutaybin am Deus ekawēn. Imēnpit warara'acayū ma eymutaybitbin Deus ekawēn—kawēn ibapukan. Eyetaybit ġu buk cekawēn pa'arēmān. Itabun'isuayū itaybit kawēn ibapukan acā, ikap'isuat kūmti kōnkōnap puxim. Kūmti kōnkōn acā iat puxim eyju dak. Iēn o ba'oreat puxim eyju, kawēn ibapukan acā eyetaybit puye. ¹³ Ikap'isuayū itaybit ġu apēn cedağ Deus xe iam, apēn cedağ ġu iam tak. Ikap'isuayū buxim eyju dak. ¹⁴ Deus bikuyap tağ jekuku'ukayū bit itaybit Deus ekawēn—kawēn iba'arēmān. Iēn o'o'ukat puxim ip. Itaybit ip ajo xipat Deus xe iam, ajo xipat ġu iam tak, jewemukūyjobitbin ip puye, jewawēwēm puye dak.

6

¹⁻² Cristo ekawēn'in pit cuy acepere—kawēn ibapukat'in. Kawēn iba'arēmān pit cuy acejekawēn wuyewemutaybit am. Kuy bima juk adi kawēn ibapukan kawēnwēn'uk ajop. Warēmtaḡ wuyekukuap cuy acepere iam kuy juk adi kawēnwēn ajop. Wuyetabun cuy ajop Deus kay iam tak cuk adi kawēnwēn ajop. Acewemubatisasaan cuy iam tak cuk adi kawēnwēn ajop. Warara'acayū jewebumōḡmōḡ wuy'abi jeje Deus pe jebiōḡbuk muōm ām wuywebe iam tak cuk adi kawēnwēn ajop. Deus ce'ū'ūayū ḡutait iam tak cuk adi kawēnwēn'uk ajop. Soat em Deus ipiat supi'ajojoat kūyjobit'ūmayū be iam tak cuk adi kawēnwēn ajop. Imēn ma juk adi kawēnwēn'uk ajop kawēn ibapukan. Kawēn iba'arēmān cuy acejekawēn ḡasū bit wuyewemutaybit am. ³ Acekawēn cuy kawēn iba'arēmān wuywewebe—Cristo ekawēn'in. Deus pe wuymutaybin puje iboam ma acejekawēn.

⁴ Jetabucap o'jepere ip pūḡpūḡayū. Iba'ore wuywebe waram ixeyū mutabut am Cristo kay. Kuy juk kawēn icēmat o'ya'ījojo ip. Kabi beat emumuūm kuy ip o'jat xipacat. Kuy juk Deus biōḡbuk kuḡ o'e ip jewebe. ⁵ Itaybit o'e ip Deus ekawēn xipat cīcā iam, Deus cuk adi xipan ixeyū o'jukuk puye. Deus ja'ōbacaap o'ḡubapukpukpuk ixeyū etabun. Imēnpuxim ja'ōbacaap ḡubapuk ipi iisuat muḡēm pima. ⁶ ḡuyjom pit jetabucap ip o'jepere. Korosa eju waram ḡuto Deus ipot pamupaya ojuyayū buxim ip. Ixe ipot waywayway ip soat a'ōpiju. Iba'ore wuywebe waram imutabun ip Jesus kay.

⁷ Deus xipan wuykuḡ. Soat em muba'at muajēmjēm kadai mu'aypapan am ku iwat xan. Itabut pinayū iḡo ku buxim—kadai ya'a'e iap puxim. ⁸ Wara'at ku be bit kadai ḡu aypapan—widaoho'ip acā. Wao'ip tak aypapan. Xipat ḡu kadaim. Wu yan ḡu aypapan. Imēnpuye:

— Ojokot ġu oku xipat'ūm puye — i'e'em ku iwat.
 Jeku epereperem, xipat'ūm puye. Jetabucap o'jepere'iaiyū
 iġo ku buxim—wao'ip'epat puxim. Xipat ġu ip Deus xe.
 Imēnpuye ipiat supi'ajojoat cebe ip. Wūy ma jeedop ip
 Deus wi ipiat'ajojom.

⁹ Oburereyū, wa'ōpuruġsū ma ōn kawēnwēn eywebe,
 eykay jījā ōn puye. Eybu'u ġu juk adi epesop eye-
 tabut am Jesus kay. Ġasū dak biġ ma juy epesop eye-
 tabun cekay. Ocetaybit Deus xipacat ūmūm eywebe
 warara'acat pe iūmūmap podi ma, kuy juk ixeye
 idax-ijo buye iam. ¹⁰ Ade em cuk adi eykitpitpiyū buywat-
 wat'uk epesop—itabucayū buywatwat'uk epesop, eyxe ip
 ikukpin puye. Ġasū dak ixeyū buywatwan eyju. Deus
 yaġuyba'ūm ġu je'e eyju ip ibuywatwan iap kay, ixeye
 cūġ ma buye. Biġ ma xipacat je'ġūm eywebe ixeyū buywatwa-
 capteim.

¹¹ — Waram Jesus ajēmap wiwim pima, biġ ma juy xipan
 epeyewewekuk — i oceju e'em eywebe. — Biġ ma juy
 jewebuywatwan epesop — i oceju e'em eywebe.
 Imēn cuy epeku eyemumuwiwi bu am.

¹² — Soat em oxe epesop — i juk o'e Deus wuywebe.
 Iboap cuy epejowiwi. Itabucayū buxim cuy eyju dak
 eyetabun epesop. Eyukpiceġēm ġu juy epesop. Xipacat
 epejat Deus xewi apēn ixeye iap taġ.

¹³⁻¹⁴ — Icēmān ōn e'em ewebe — i juk o'e Deus Abraão
 be. — Xipacat oġūm ewebe — i juk o'e cebe. — Ekpon
 oġūm ewebe — i. — Enaxeġebitbit ade jījā ecesūy — i juk
 o'e.

Imēn i'e buje: — Ja'ōmuwarurun ġu ōn — i dak o'e Abraão
 be. — Wa'ō daġ ma oce ewebe — i juk o'e. Ka'ūmġu Deus
 podi ya'ōbacaat. Imēnpuye:

— Apēn kuy juk oce iap taġ oce wara'acat a'ōbi
 ġu—wa'ōbi ma — io'e Deus.

¹⁵ Abraão yukpicegẽ ġu osunuy jetabucap kuġ.

— Deus okpon je'ġūm owebe — i juk adi o'e'e jewebe ma. Imēnpuye ipot o'kap Deus ekawēn taġ. Deus ja'ō daġ o'ġūm cebe. ¹⁶ Ijodiat “Ja'ōmuwarurun ġu ōn” i'e ojuy bima, jebodi ma ya'ōbuyxiat nomuwāwām ibutet mubararak am taperadup pe.

— Ja'ōmuwarurun ġu ōn Deus aġ wuykay buye — i'e'em ijodiat.

Imēn i'e buje, ya'ōxik pa'ore ya'ījojmayū be.

¹⁷ — Soat em oxe epesop — i juk o'e Deus jebekitkiyū be. Ixeyū be ma “Ja'ōmuwarurun ġu ōn” i'e ojuy osunuy Deus—ġuyjom jexe dopayū be. Imēnpuye o'jekawēn cebe ip.

— Wa'ō daġ ma oce eywebeam, ōn soat em wetait puye — io'e cebe ip. ¹⁸ — Wa'ō daġ ma oce eywebeam — i'e'em Deus.

Ja'ō daġ ma e'em soat em. “Apēn cuk adi kuy ma ocece iap taġ oce, ōn soat em aġ puye” i'e buje, ja'ō daġ ma je'e. Deus ja'ōmu'ipi'ūm ġu. Napapa'uk ġu. Wuy-muġuykukukum ġu—pūġ em tak ka'ūma. Cepiriġ puje, oakōm'iaiyū jedokdoġ kobexixi baġbaġ kay je'ūap puxim. Ixeyū buxim wuyju dak wuyetabut Jesus kay wuye'ūap puxim. Soat em ixē wuya'ōmucanucan. Imēnpuye soat em Deus xe wuyetait acesop iap ajowiwi jījā. ¹⁹ Soat em Deus xe acesop iap wiwim cīcā wuyju. Imēnpuye wuyetabucap kobexixi muycūcūap puxim. Imuycūcūap muakōm puje, wara'at taġtaġtaġ ġu cucum. Jecūap pe ma dopdom. Imēnpuxim wuyju dak wara'at kaykaykay ġu wuyetabut—pūġ kay acā—Jesus Cristo kay acā. Soat em wuyju ġebum cekay. Paī yoboġat ōmōm'uk osunuy Deus eju kawēnwēnap'a beat epaġo daġwi badiat'a be. Ōmōm'uk osunuy kawēn ām Deus eju jebekitkiyū beam. Kabi be bit Jesu oōm. Deus xe nuynuy ġasū kawēnwēn

wuywebeam. ²⁰ Jesus o'jeu kabi kay wuyeu'ũm awap. Koap o'jeu. Kaomũm acejeu cekay. Wuyepaĩm o'e yoboğan. Soat em wuyepaĩm jeenuy apẽn Melquisedeque paĩ osunuy iap puxim.

7

¹ Ixe Melquisedeque Salém ka kukukat osunuy. Deus epaĩ osunuy—soat podi ma ya'òbacaat epaĩ. Abraão jepit-pin osunuy nopağõğõap tağwi—warara'acat ka kukukayũ aokakaap tağwi. Melquisedeque Abraão o'topabijuk e dağ jepin pima.

— Deus cuy xipacat je'ğũm ewebe — io'e Melquisedeque Abraão be.

² Abraão jebubut'in o'ğũm Melquisedeque be. Ade ma o'ğũm cebe. Pũğ ma o'ğũm cebe 10 beat'in. Nopağõğõap pewiat pupu o'ğũm cebe—yaokaka'ibiyũ bubutpupu. Ibutet Melquisedeque cedağ ma jebekitkit kuğ iape. Ixe Salém ka kukukat osunuy. Ika butet Salém kaba'ũm jebekitkit kuğ iape. ³ Wuyetaybit ģu Melquisedeque ebay buten, ixi buten tak, idobuyũ'ũm'ũm puten tak. Puju ix e o'kap iam tak wuyetaybit ģu, puju oe'ũ iam tak.

— Soat em cuy paĩm eğuy — i juk o'e Deus cebe—Melquisedeque be.

Imẽn o'e jekpot pe dak.

⁴ Ğebum cuy epesop Melquisedeque ya'òbuyxi jĩjã osunuy iap kay. Abraão Judeuyũ ebapuk ebika osunuy. Imẽnpit jebubut'in o'ğũm cebe. Nopağõğõap tağwiat pupu o'ğũm cebe—idip cĩcãat. ⁵ Kuyje Moisés o'e Levi ipotpot pe:

— Judeuyũ juy jebubut'in je'ğũm eywebe, eyju ixeyũ epaĩyũ buy — i. — Pũğ ma juy je'ğũm ip eywebe 10 beat'in — i.

Iměntak ibararak opop wuyawěwěap ekawěntup pe. Jebadipyũ xewi ibubu'uk osodop ip jebubun, ixeyũ dak

Abraão naxegebitbit ma'ḡu osodop. ⁶ Melquisedeque bit Levi diwat ḡu osunuy. Abraão bit jebubut'in o'ḡūm cebe. Pūḡ ma o'ḡūm cebe 10 beat'in. Nopaḡōḡōap taḡwiat pupu o'ḡūm cebe. Kuyje:

— Ijop eipi oḡūm eipim — i juk o'e Deus Abraão be. — Enaxegebitbit ade jījā ecesūy — i juk o'e cebe. Melquisedeque bit:

— Deus cuy xipan jekuk — io'e cebe—Abraão be.

⁷ Ya'ōbuyxiat jēḡ'aecōḡcōḡ ḡu ya'ōbuyxi'ūmat topabe “Deus cuy xipan jekuk” i'e am cebe. Ya'ōbuyxi'ūmat pit jēḡ'aecōḡcōḡ ya'ōbuyxiat pe “Deus cuy xipan jekuk” i'e am cebe. ⁸ Ijodiayū jebubut'in iūmūm paīyū be—je'ū'iyū be. Imēnpit Deus ekawēntup e'em: “Melquisedeque je'ū ḡu—itabēḡ ma jeenuy,” i. Imēnpuye jebubut'in o'ḡūm cebe. ⁹⁻¹⁰ Melquisedeque be Abraão dopabijuk puje, Levi o'kap ḡu buk. Inaka:

— Kuy Abraão jebit pe bit osodop kake — i wuyju e'em. Melquisedeque be Abraão be jebubut'in iūm puje, “Levi dak jebubut'in o'ḡūm,” i wuyje e'em, ixē Levi Abraão jebit pe buye. Ḡasū dak Levi naxegebitbit ibubut pupum jebadipyū xewi Moisés a'ōbi. 10 beat pewi pūḡ ma ibubum ip.

¹¹ Paīyū kake wuyawēwē ām cedaḡ ma wuyeku am Deus bikuyap taḡ. Levi ipotpoyū be bit ya'ōmucan pa'ore osodop ip Deus bikuyap taḡ ceku am ip. Imēnpuye Deus wara'acat o'jomuy wuyepaīm ixeyū dieḡ. Cristo ma o'jomuy. Ixe Cristo paīm o'e apēn Arão paī osunuy iap puxim ḡu—apēn Melquisedeque paī osunuy iap puxim acā. Cristo ja'ōbacaap mōḡmōḡ wuywebe Deus bikuyap taḡ wuyeku am. ¹² Moisés ekawēn taḡ paīyūm osodop ip Levi ipotpoyū. Ḡasū bit wara'at Deus ebekitkit epaīm o'e Arão naxegebitbit tieḡ. Imēnpuye kawēn kuyat taḡ

ġu wuyju jekukum ġasū—Moisés ekawën taġ ġu. Kawën iisuat taġ acã wuyju jekukum ġasū—Jesus ekawën taġ.

¹³⁻¹⁴ — Ĕn ġasū webekitkiyū epaïm ecesūy yoboġan — i juk o'e Deus wuykukukat Jesus pe.

Ixe Jesus Levi naxeġebit ġu. Wara'at tiwat ma wuykukukat. Judá naxeġebit ixe. Païyūm ġu osodop ip Judá naxeġebitbit. Judá naxeġebitbit ġu wūnca mupikupik'uk osodop ip Deus etabutpeap ceje—mesa jeje—Levi naxeġebitbit acã. Moisés Judá naxeġebitbit ġu o'taē païyūm. Levi naxeġebitbit acã o'taē païyūm.

¹⁵ Apën cuk adi ocece iap biġ ma ibapuk e'em ġasū. Wara'at o'jebapuk païm—Melquisedeque buximat.

¹⁶ Ijodiat a'ōbi ġu ixe Jesus païm o'e ijodiat pabi daġ ġu dak. Ixe Deus ebekitkit epaïm o'e ġasū soat podi ma ya'ōbaca buye; soat em itait jeenuy buye dak. ¹⁷ Imën e'em Deus ekawëntup:

Soat em webekitkit epaïm cuy eġuy apën Melquisedeque paï osunuy iap puxim, i. Ĕn ixeyū epaïm iap i'ūm ġu, i.

¹⁸ Ibacã'ūm osodop ip kawën kuyat taġ jekuku'ukayū—wuyawēwēap ekawën taġ jekuku'ukayū. Ixeyū be iba'ore osodop cedaġ ma jeku am Deus etabutpe ibacã'ūm puye. Imēnpuye “Kawën kuyat taġ cuy epeku” i'ūmġu e'em Deus ġasū bit— “Kawën iisuat taġ cuy epeku” i acã. ¹⁹ Ka'ūma ma soat taġ iisuan o'e Moisés ekawën taġ jekukuap tomuju. Imēnpuye soat em Deus xe acesop iap wiwimsū ma osodop ip Moisés ekawën taġ jeku ojuyayū. Deus pit wara'at o'jomuy wuyepaïm. Warara'acat emumuwiwi bodi ma wuyemumuwiwi xipat. Imēnpuye soat em ixe xe acesop iap wiwimsū ġu wuyju. Iwiwim cīcã ma. Wuyparara ġu kawën ām Deus eju, Jesus wuyepaï buye.

²⁰⁻²¹ Jebekitkit epaïm Cristo muy buje:

— Apĕn cuk adi ocece iap tağ cuy oce, soat em wetait puye — io'e Deus.

Jebekitkit epaĩm Levi naxeğebitbit mōğ puje bit, imĕn ġu o'e cebe ip. Jesus muy buje acā “Wa'ō dağ cuy oce, soat em wetait puye” io'e Deus. Imĕn e'em Deus ekawĕntup:

“Webekitkit epaĩm cuy eğuy soat em,” io'e Deus, i. “Ĕn ixeyũ epaĩm iap i'ũmğũ,” io'e, i. Deus ja'ō o'jewa'ōepere cexe ip, i. Ja'ōmuwarurun ġu Deus pit, i.

Imĕn Deus o'e Jesus muwĕnuwĕn.

²² — Apĕn cuk oce iap tağ cuy oce — io'e Deus warara'acayũ be ġu—Jesus pe acā.

Imĕnpuye wuyetaybit kawĕn iisuat kawĕn kuyat podi ma xipat iam. Deus jekawĕn o'ğuwĕn Moisés pe. Xipat osunuy ibo ekawĕn—kawĕn kuyat. Kawĕn iisuat pit kawĕn kuyat podi ma xipat.

²³ Ade ip osodop Levi naxeğebitbit. Oe'ũ'ũ ip. Ixeyũ'inat e'ũ buje wara'at ma paĩm o'e oe'ũiat tieğ. ²⁴ Jesus pit soat em itait nuynuy. Warara'acat ġu wuyepaĩm je'e ixie dieğ. Jesus acā soat em jeenuy wuyepaĩm. ²⁵ Ixe Jesus soat em itait. Soat em ixie kawĕnwĕn Deus eju jekay itabucayũ beam.

— Okayayũ buywatwan cuy eğuy — i'e'em Deus pe. Wuywebe cekawĕn put Deus eju Jesus kay wuyetabut puye. Imĕnpuye Jesus pe wuydaxijo but—itabucayũ taxijo but. Ğasũ ja'ōkayayũ taxijo but cebe. Ğuyjom tak taxijo but cebe. Soat em ma ja'ōkayayũ taxijo but je'e cebe.

²⁶ Jesus ma wuyepaĩ yoboğat. Soat i'e ba'ore wuywebe wuya'ōca'ũm puye. Ajo wuywebe i'e ba'ore iap Jesus pe bit i'e but. Ixe be wuya'ōmucan put soat em. Ixe soat tağ iisu. Ka'ũmğũ xipat'ũmat cebe. Ikĕrĕat kuğ ġu ixie. Ikĕrĕat o'ğugĕ ġu—pũğ em tak ka'ũma ma. Ikĕrĕat mujurũğrũğ'ukat puxim ġu ixie. Deus ixie o'ğuyu kabi be

soat em tũy ãm jexe. ²⁷ Warara'acayũ paĩ yoboğayũ soat kabia wũnca ãn mupikupik'uk osodop ip Deus etabutpe. Iẽn mupiğ pima:

— Ikẽrãat cuy eju'uk owebewi — io'e ip Deus pe.

Jewebewi i'ukap ojuy bima acã “Ikẽrãat cuy eju'uk ebek-itkiyũ bewi” io'e ip Deus pe ixeyũ ma. Jesus pit ixeyũ buxim ğu. Pũğ em ma o'jewewũm Deus pe. Pũğ em ma ixexoe'ũ ikẽrãat uk am soat pewi wuywebewi. Jekpiwan ma o'jaakaat. Waram pit je'ũ ğu. ²⁸ Moisés ekawẽn tağ jeku ojuyayũ ijodiacat muymuy'uk osodop jepaĩm yoboğan. Arão naxeğebitbit muymuy'uk osodop ip jepaĩm yoboğan. Soat tağ osodop icẽmayũ ğu ixeyũ dak. Deus pit o'jekawẽn jekpot pe Moisés pe jekawẽğap tomukadi.

— Ën acã icẽmat soat tağ — io'e jekpot pe. — Imẽnpuye ãn acã eğuy webekitkit epaĩm yoboğan — io'e Jesus pe. — Ën ixeyũ epaĩm iap i'ũm ğu — io'e cebe.

8

¹ Jesus wuyepaĩ yoboğat. Ixe Jesus xik'i omuy Deus ba'at kadi kabi be—soat podi ma ya'õbacaat xe. Deus co'i ixexoe'ũ ya'õbaca. Ibom acã oceju eymutaybin ojuy. ² Kuyje badiat'a be Deus nũynũyap'a ibuyxi jĩjãat'a be õmõm'uk osunuy torojo'a be paĩ yoboğat. Jekawẽn ãm Deus eju jebekitkit peam õmõm'uk osunuy. Ijodiat emuamuy'a be õmõm'uk osunuy Deus eju kawẽnwẽnap'a be. Jesus pit ijodiat emuamuy'a be ğu omuy—Deus tũytũyap pe acã. Iboce ma ixexoe'ũ kawẽnwẽn Deus eju wuywebeam.

³ Kuyjeayũ ijodiat muymuy'uk osodop jemumuũm ãm Deus pe wũnca ãn mupik am tak cetabixe. Imẽnpuxim cuy wuyepai dak je'ğũm Deus pe. ⁴ Jesus ğasũ dak ijodi bima, paĩdip ğu kuka adi o'e warara'acat kuy paĩyũm o'e buye. Levi naxeğebitbit kuy paĩyũm o'e. Jedobuyũ'ũm'ũm ekawẽn tağ ip jebekitkiyũ emumuũm

ũmũm Deus pe—Judeuyũ'ũm'ũm ekawẽn tağ—kawẽn kuyat tağ. ⁵ Co'a bicũğpe bima Deus Moisés o'ğukũyjo torojo'a muy ãm. Torojo'a muğẽap piõğbuk o'ğugẽ imubapuk am cebe mẽnku juy eyamuy iam.

— Cedağ cuy eğugẽ apẽn cuk oce ewebe iap tağ — io'e Deus cebe.

Jesus jebekitkiyũ buywatwan kabi kadiwi. Ijodi dak paĩyũ ixe buxim jebekitkiyũ buywatwan e'em. Jesus pit ixeyũ bodi ma wuybuywatwan. ⁶ Jekpot pe bit Deus kapikap o'ğũm xipat cĩcãap Levi naxeğebitbit pe iũm'ibit podi ma. Kuyje Deus jekawẽn o'ğuwẽn Moisés pe. Ibo ekawẽn kawẽn idip osodop. Ğuyjom pit jekawẽn o'ğuwẽn jekpot pe. Ibo ekawẽn kawẽn kuyat podi ma kawẽn idip osodop. Ibo ekawẽn kay wuyetabun puje, Deus wuymuisusun soat tağ. Wuyetaybit soat em Deus xe acesop iam ibo ekawẽn kay wuyetabut puye. Imẽnēju kuyjeayũ bodi ma wuycokcok.

⁷ Deus koap jekawẽn o'ğuwẽn Moisés pe. Kawẽn kuyat soat ekawẽn podi ma idip pima, kuka juk wara'at ğu o'ğuwẽn kawẽn iisuat. ⁸ Deus pit jebekitkit o'tobuxik jekawẽn mupubutbun. Imẽn ma ixe e'em cebe ip:

Ğaxĩn ma juy kawẽn iisuat oğuwen Israel naxeğebitbit pe—Judá naxeğebitbit pe, i. ⁹ Kuyje juk adi wekawẽn oğuwẽnuwẽn eydobyũ'ũm'ũm pe, i. Iboap ekawẽn co'i ğu ğasũ bit oğuwẽn webekitkit pe—wara'at ekawẽn acã, i. Egito eipi bewi eydobyũ'ũm'ũm mujẽm puje, wekawẽn oğuwẽn cebe ip imukũyjoap ojuy, i. Imẽnpit ip oibu'un wekawẽn kay, i. Imẽnpuye õn tak obu'un ma oce cekay ip ağ am, i. Imẽn Deus e'em, i. ¹⁰ Ğaxĩn ma juy wara'at kawẽn oğuwẽn Israel naxeğebitbit pe—kawẽn iisuat, i. Oğugebu ip wekawẽn kay, i. Soat em ğebum jeedop ip wekawẽn kay, i. Icocok jeedop ip wekawẽn tağ jeku am, i. “Deus acã ocekekukat,” i je'e ip soat

pe, i. “Teyũku webekitkiyũ” i ðn tak oce soat pe, i. ¹¹ Soat je'e itaybit ðn—ya'õbuyxiayũ, ya'õbuyxi'ũmayũ dak—yoboğayũ, yopĩcayũ dak, i'e'em Deus, i. Jewe-mutaybitbin ġu jeedop ip Deus e'e am, kuy itaybit ip puye, i. “Ocemutaybin cuy epe'e Deus ekawẽn,” i'ũmġu je'e ip jebureyũ be, soat itaybit je'e buye, i. ¹² Ğebum ġu oce apẽn cuk adi warẽmtağ oekukuku ip iap kay, i. “Ikẽrẽat kuğ eyju oxo,” i'ũmġu oce cebe ip—pũğ em tak ka'ũma, ġebum ġu oce iboap kay buye, i. Deus imẽn e'em jebekitkit pe—kuy o'ğuisun'iaiyũ be.

¹³ Iokokat dao ma i'ũm. Iisuat pu buje, iokokat kuğ ġu ace'e. Imẽnpuxim:

— Kawẽn kuyat cuy epeyepere — i'e'em Deus ġasũ bit.
— Kawẽn iisuat tağ cuy epeku ġasũ bit — i'e'em wuywebe.

9

¹ Kawẽn kuyat tağ jeku ojuyayũ “Ën xipat cĩcã” i'e'e'uk osodop ip Deus pe ceweju kawẽnwẽnap'a be—ijodiat emuamuy'a be. ² Torojo'a o'yamuy ip wuydobuyũ'ũm'ũm—koapat'a. Kacũğkadiat'a be lâmpada'a o'yanuy jemũn ceje—ouro muğẽğẽ'a. Mesa dak osunuy iğo'abi be ourom yajuyjuyat. Iğo emesa jeje pão'a mõğmõğ'uk osodop ip Deus etabixe yamõğmõğ'ibit'a. Kacũğkadiat'a be “Deus tũytũyap'a” io'e wuydobuyũ'ũm'ũm. ³⁻⁴ Pağo toro'i oeku badiat'a exĩntabi nomudim—idip cĩcãat—iarixiğat. Tõmte'okuatõm mupikupikap osunuy ixe pağo xe—toro'iat xe. Badiat'a be “Deus tũytũyap'a ibuyxiat'a” io'e ip wuydobuyũ'ũm'ũm. Caixa'a o'yanuy badiat'a be. Iğo'a ourom yajuyjuyat'a o'yanuy. Deus ekawẽn kukatopa mũn'a o'yanuy iğo'a be—witadopa be ibararak iat mũn'a. Iğo'a be itĩğ'a'it'it'a buximat'a dak o'yanuy—ouro muğẽğẽ'a'a.

Manada dak o'tanuy iġo'a be—pão'anõmnõm puximata. Arão ba'ip tak o'yoptüy iġo'a be caixa'a be—kuyje o'yopkobinõjẽm'iat'ip. Witadopa dak o'topadop iġo'a be caixa'a be xepxoptopa—yaerūnatopa. Deus ekawẽn ibararak osodop iġodopa be—kawẽn kuyat. ⁵ Caixa'a jeje xepxep idip cĩcãat piõġbuk osodop. Ceġeba abiwebotbot osodop ip caixa'a ase. Deus nuynuy jebekitkit parakpe iap kay ġebumiap'a o'yanuy. Iġo caixa'a jo buje wuyju ġebum Deus ikērẽat uk'uġ wuywebewi iap kay. Ġasū bit o'e ġu ocewebe soan eymutaybin am apẽġape soat iboap osodop torojo'a be iam.

⁶ Badiat'a be paĩyũ õmõm'uk osodop ip kacũġkadiat'a be. Soat kabia õmõm'uk ip osodop jekapik am Deus etabutpe. ⁷ Badiat'a be bit paĩ yoboġat acã õmõm. Pũġ kabia ma õmõm pũġ koato dujukap pujejeje ma. Wũnca doy dujuõmõm'uk osunuy badi toymubapuk am Deus pe.

— Ikērẽat cuy eju'uk owebewi ite'ũm oe'ũ buye ikērẽat muġẽġẽap teida am — i'e'em Deus pe. — Ebekitkit pewi dak ikērẽat cuy eju'uk ite'ũm oe'ũ buye ikērẽat muġẽġẽap teida am — I'e'em Deus pe. — Itaybit'ũm pima ip ikērẽat o'ġuġẽġẽ — i'e'em cebe.

⁸ Badiat'a be paĩ yoboġat acã oõm iap kay wuyju ġebum pima, xipat cĩcãat piõġbuk wuymutaybitbin koapat'a torojo'a kake bima iõmpi osodop ip ijodiat badiat'a be—Deus tũytũyap'a ibuyxi jĩjãap'a be iam. ⁹ Iõmpi osodop ip iap kay ġebum pima, wuyetaybit tak apẽn ġasū bit wuyõmpi ġu o'e iam. Kuyje ade wũnca mupikupik'uk osodop ip Deus etabutpe. Ade ma ip iũmũm'uk osodop cebe. Imẽnpit soat taġ ġu iisu o'e ip, ade ma'ġu ip iũmũm. Wuyetaybit iboam. ¹⁰ Pũġpũġ xat i'opi osodop kuyjeayũ be. Pũġpũġ xati dak tikõnpi osodop cebe ip. Jewewuywuy'uk osodop ip jebabim—Deus ekawẽn taġ—kawẽn kuyat taġ. Jebacia'abi wuywuy'uk tak osodop ip jebabim.

Imēnpit kacūḡkadwi acā ip jewesupsup'uk osodop. Deus badiat muisusun'ūm pima jeweweju acā ip iisu. Deus pe jemuisunap wiwim ip osodop.

¹¹ Ḡasū bit Cristo kuy osodot. Wuyepaīm o'e yoboḡan. Ḡasū:

— Xipacat oḡūm eywebe — i'e'em ixē wuywebe.

Ijodiat emuamuy'a be ḡu ixē kawēnwēn Deus eju wuywebeam—ipi juat'a be ḡu. Kuyat'a bodi ma ixē nuynuyap'a xipat. Kuyat'a bodi ma ixē nuynuyap'a yadip. ¹² Cristo bode doy ḡu o'toydujuōm toymubapuk am Deus etabutpe, biopak toy dak ka'ūma. Ixē o'jedoyekereren korosa be apēn cuk adi ikērēat aḡuḡḡḡḡ iap teida am. Ixē oōm Deus tūytūyap pe apēn kuyje paī yoboḡat oōm badiat'a be iap puxim. Deus xe soat em acesop iaptei o'teida o'jedoyekereren puye. ¹³ Bode doy mubapukpuk'uk osodop ip Deus etabutpe, biopak toy dak kuyjeayū paīyū. Jebabi daḡ ip toymubapukpuk'uk osodop Deus ekawēn taḡ—kawēn kuyat taḡ. Jebabi daḡ tak ip biopak'it'it ēn pik muwekoykoy'uk osodop ip idibi be. Ibiati sūḡsūḡsūḡ'i o'e ip jebekitkit'abi daḡ. Iḡo ekawēn taḡ iisuan o'e ip ibiati sūḡsūḡ'i buje. Inaka kacūḡkadiwi acā ip iisu o'e. Badi bit ka'ūma. ¹⁴ Bode doy, biopak toy dak kacūḡkadiwi acā wuy-muisusun. Cristo doy bit bode doy bodi ma xipat. Biopak toy bodi ma xipat. Ixē doy badi dak wuy-muisusun. Cristo o'jedoyekereren wuywebeam iap kay wuyetabun puje, kacūḡkadiwi ā ḡu wuyisu ace'e. Badi dak wuyisu ace'e. Ixē Cristo ikērēat kuḡ ḡu osunuy. Pūḡ em tak ikērēat o'ḡuḡḡ ḡu. Deus biōḡbuk a'ōbacaap kuḡ osunuy—soat em itaicat biōḡbuk a'ōbacaap kuḡ. O'jeweūm Deus pe je'ū ām wuywebeam. Deus bikuyap taḡ oe'ū.

— Bay — io'e Deus pe. — Apēn kuyjeayū muisusun'uk eḡuy wūnca e'ūap tomuju iap podi ma ipi juayū eḡuisun we'ū buje — io'e Deus pe—jebay be.

Ixe o'jedoyekereren wuywebeam oe'ũ iap kay wuyetabun puje. Deus wuymuisusun waram warẽmtaḡ ma wuyekuap puxim. Soat taḡ wuymuisusun wuywebe kapik am Deus peam—soat em itaicat peam.

¹⁵ Ikẽrẽat mujurũḡrũḡ'uk ip osodop kawẽn kuyat taḡ jeku ojuyayũ. Cristo bit oe'ũ ikẽrẽat uk am ixeyũ bewi. Ikẽrẽat muḡẽḡẽaptei o'teida je'ũ ãm. Imẽnpuye:

— Waram ḡuto Deus jekawẽn o'ḡuwẽn eywebe—kawẽn iisuat — i'e'em Cristo ijodiacat pe.

— Soat em epesop oxe xipacap kuḡ eye'ũ buje — io'e Deus kuyje.

Soat em jeedop ip cexe Deus emunaẽyũ, Cristo oe'ũ buye. Soat em jeedop ip cexe apẽn ixekuk adĩ o'e'e iap taḡ.

¹⁶ “Obubut'in epejat we'ũ buje” i'e buje ijodiacat, ce'ũ buje acã ibubum ip. Ce'ũ'ũm pima bit ibubum ḡu ip.

¹⁷ Itabẽḡ pima ibubum ḡu ip. Ce'ũ buje acã ip ibubum.

¹⁸ Imẽnpuxim wuydobuyũ'ũm'ũm pe wũnca aoka buje acã, kawẽn kuyat taḡ jekuku'uk ip osodop wuyawẽwẽap ekawẽn taḡ. ¹⁹ Koap Moisés Deus pe jawẽwẽap ekawẽn o'ḡuwẽn jebekitkiyũ be. Biopak'it'it o'yaoka. Bode dak o'yaoka. O'toymuwekoy idibi be. Kadaidup o'tupu hissopodup. O'tupmukirik lãbum—bõrõbu buximatpum—ibupakpukatpum. O'toymusũḡsũḡsũḡ tu-pararakatup taḡ—Deus ekawẽntup taḡ. Jebekitkiyũ abi daḡ tak o'toymusũḡsũḡsũḡ Deus ekawẽn taḡ—kawẽn kuyat taḡ.

²⁰ — Deus jekawẽn o'ḡuwẽn wuywebe — io'e Moisés jebekitkiyũ be. — “Wekawẽn taḡ cuy epeku,” i juk o'e wuywebe — io'e Moisés. — Ite doy musũḡsũḡsũḡ õn ey'abi daḡ eywebe kũyjobit am Deus a'õ kay — io'e Moisés jebekitkiyũ be.

²¹ Imẽnpuxim torojo'a jeje dak o'toymusũḡsũḡsũḡ Moisés. Iḡo'a beat taḡ tak o'toymusũḡsũḡsũḡ soat taḡ. “Ën

xipat cĩcã ocewebe” i'e'em pima jebui be ikuḡ iat taḡ o'toymusũḡsũḡsũḡ. ²² Wuyawewēap ekawēn taḡ jeku ojuyayũ wũnca doymukereren'uk ip osodop Deus pe jemuisun am. Toymukereren'ũm pima kuka juk Deus ikērēat o'ju'uk ḡu cebewi ip. Deus ekawēn taḡ toymukereren ip osodop soat muisun am kawēn kuyat taḡ.

²³ Imēn jebekitkiyũ muisusun'uk osodop ip paĩyũ apēn kabi beacat jewemuisusunap puxim. Wũnca aokaka'uk ip osodop ijodiacat muisun am. Kabi kay cumayũ muisusunap pit wũnca bodi ma xipat. ²⁴ Imēnpuye torojo'a be ḡu Cristo oõm—ijodiat emuamuy'a be ḡu—kabi beat'a buximat'a be ḡu. Kabi be ma oõm—Deus tũytũyap pe ma. Ibocewi ma ḡasũ ixekawēnwēn Deus eju wuywebeam. ²⁵ Judeuyũ epaĩ yoboḡat ma soat koato õmõm'uk osunuy badiat'abi be, Deus tũytũyap'a ibuyxiap'a be. Õmõm'uk osunuy wara'at toy kuḡ—wũnca doymukḡ. Deus tũytũyap'a be õmõm'uk osunuy Deus pe ikērēat ukap ojuy. ²⁶ Cristo bit soat em ḡu oõm jewewũm am Deus pe je'ũ am. Soat koato ḡu oe'ũ—pũḡ em ma. Pũḡ em ma o'jedoyekereren ikērēat mujurũḡrũḡap teida am. Jesus e'ũap wũnca e'ũap co'i bima, ipi muḡē ebika ma kuka juk adi je'ũ'ũ'uk o'e. Ade em kuka adi oe'ũ'ũ. Poḡ. Poḡ. Poḡ. Bodimaku kuka adi je'ũ'ũ'uk o'e. Pũḡ em pit o'jebapuk ipi oi'ũm pin pima. Waram tak ḡu je'bapuk ikērēat uk am ipi juacat pewi. ²⁷ Soat ace'ũ pũḡ em ma. Wuye'ũ buje Deus apēn ijodi bima juk adi ajekukuku iaptei ideida wuywebe soat pe. Ipiat supi'ajoat kũyjobit'ũm topibiyũ be kũyjobit'ũmapteim. Xipacat pit je'ḡũm kũyjobicayũ be. ²⁸ Imēnpuxim Cristo jekpiwan ma oe'ũ apēn paĩ wũnca o'yaoka iap puxim. Oe'ũ soat pewi ipi watwat pewi ikērēat uk am. Pũḡ em ma oe'ũ. Waram pit jajēm ijodi. Ikērēat uk am ḡu jajēm. Jajēmap wiwimayũ daxijo am acã jajēm.

10

¹ Judeuyū awēwēap ekawēn tağ jeku ojuyayū itaybitbūt ā ip osodop kawēn icēmān. Itaybitbūt ā ip osodop xipacat ajat iam. Soat tağ ġu iisu ip osodop iboap ekawēn tağ jeku ojuyayū. Soat koato paīyū wūnca aokaka'uk ip osodop Deus pe ikērēat uk ojuy jebekitkiyū bewi. Deus pit soat tağ ġu ixeyū ja'ōkayayū o'ğuisun. ² Soat tağ iisu bima waram kuka adi o'e ip iğuycūğ ġu oceju ikērēat kuğ iap kay. Soat tağ iisu bima, kuka adi wūnca aokakaap ip o'jepere. ³ Imēnpit soat koato wūnca aokaka'uk ip osodop ikērēat eju'uk ebekitkiyū bewi i'e ojuy Deus pe. Yaoka buje:

— Oceisu Deus xe ġasū bit; ikērēat kuğ ġu oce'e — i'ūmğū o'e ip. — Ģasū bit ġuto oceju ikērēat kuğ — i acā ip o'e.

⁴ Biopak toy bit ikērēat uk'uğ ġu wuywebewi, bode doydak.

⁵ Imēnpuye Cristo osodot ijodi. Ixe don pima, o'jekawēn jebay eju—Deus eju.

Ijodiat pe wūnca aokaat pin ġu ēn, io'e Deus pe. Cebe ip wūnca ūmat pin ġu dak ēn, io'e. Ojebin pit eğūğē owebe ipi juan, io'e Deus pe. ⁶ Etabun wūnca mupik ip puje, ecokcoğ ġu eğuy, io'e. Ijodiat pe wūnca aoka buje ikērēat uk am, ecokcoğ ġu eğuy, io'e.

⁷ Imēnpuye, “Bay, ijoce ōn oajēm ebikuyap tağ weku am—emucokcok am,” i juk oce ewebe. “Apēn Judeuyū awēwēap ekawēntup omuwēnuwēn iap tağ weku pin,” i juk oce ewebe.

Imēn Cristo o'e jebay be—Deus pe.

⁸ — Ijodiat pe wūnca aokaat pin ġu ēn, wūnca ūmat pin ġu dak — i juk o'e Jesus Deus pe. — Wūnca aoka buje ikērēat uk am, ecokcoğ ġu eğuy, etabun wūnca mupik ip puje dak — i juk o'e.

Imēn Jesus o'e kawēn kuyat taḡ ma'ḡu ip imupikupiḡ—Judeuyū awēwēap ekawēn taḡ.

⁹ — Bay, ijoce ōn oajēm ebikuyap taḡ weku am—emucokcok am — i juk o'e ḡebuḡe bit.

— Kuyjeat puxim wūnca juy epeyaoka owebe ikērēat uk am eywebewi — i'ūmḡu e'em Deus ḡasū bit. — Ikērēat oju'uk eywebewi Cristo oe'ū buye — i acā e'em Deus wuywebe.

Kuyat pit wūnca aokakaap Deus o'ḡu'ūm. Ikērēat uk'uḡ wuywebewi Cristo oe'ū buye. ¹⁰ Deus bikuyap taḡ jekuku'uk osunuy Jesus Cristo. O'jeweūm Deus pe je'ū ām. Jekpiwatpin ma oe'ū. Pūḡ em ma oe'ū ikērēat uk am soat pewi wuywebewi. Imēnpuye Deus wuymuisusun soat taḡ.

¹¹ Judeuyū epaī ma soat kabia cūḡ'i osunuy jekapikap kuḡ. Soat kabia wūnca mupikupik'uk ip osodop. Iboap kuḡ osunuy nuynuy soat em. Imēnpit wūnca mupikupikap ikērēat uk ojuy ḡu. Imēnpuye Deus ikērēat o'ju'uk ḡu wūnca mupik puḡe dak. ¹² Jesus Cristo bit pūḡ em ma oe'ū wūnca e'ūap puxim ḡu. Oe'ū ikērēat uk am soat pewi wuywebewi. Waram pit je'ū ḡu. O'jeu Deus kay. Oabik jebay xe—Deus xe. Iba'at kadi oabik. Soat kukukan o'e ixe eju. ¹³ Deus jekpot kay itakomaayū a'ōbacaap ḡu'ūm. Kūyjobin jeedop ip Deus a'ō kay. Cristo omuy jebay xe iboap wiwim. ¹⁴ Pūḡ em ma oe'ū ikērēat uk am soat pewi wuywebewi. Soat ikērēat kuḡ'ūmayū o'ḡuisun soat taḡ. Soat taḡ iisu jeedop ip soat em ma.

¹⁵ Imēn Deus biḡḡbuk tak wuymutaybitbin. Imēn koap o'e:

¹⁶ “Ixeyū kabia kap puḡe wara'at ekawēn oḡuwēn webek-itkiyū be kawēn iisuat,” i'e'em Deus, i. Soat em ḡebum jeedop ip wekawēn kay, i. Icocok jeedop ip wekawēn taḡ jeku am, i.

¹⁷ ḡuyjom imēn o'e:

“Ĝebum ĝu oce apĕn cuk adi ikĕrĕat o'ĝuĝĕĝĕ ip iap kay, apĕn cuk adi warĕmtaĝ ma oekuku ip iap kay dak,” i'e'em, i.

¹⁸ Deus pe wuywebewi ikĕrĕat uk puje, waram pit wĭnca aceyaoka ĝu ikĕrĕat uk an. Jesus e'ĭap kuy o'e ikĕrĕat ukap teida am.

¹⁹ Imĕnpuye, okitpitpiyĭ, wuyparara ĝu jekawĕn ām Deus eju, korosa be Jesus oe'ĭ wuywebeam puye. Apĕn kuyjeayĭ Deus tĭytĭyap'a ibuyxi jĭjāap'a be ĕmĕmap puxim wuyekawĕn put ceweju. ²⁰ Paĭ yoboĝat acā paĝo daĝwi ĕmĕm'uk osunuy badiat'abi be kawĕn ām Deus eju. Wuyju bit kawĕnwĕn Deus eju Jesus e'ĭap puye. Ixe Jesus soat em itait. Jesus e isuat e buxim—Deus kayat e buxim. Imĕnpuye soat em wuyekawĕn put ceweju. ²¹ Jesus wuyepaĭ yoboĝat. Ixe soat itabucayĭ kukukat. ²² Imĕnpuye juy acekawĕn ceweju. Jewexe ĝu juy acekawĕn ceweju. Wuyetabun cĭcā ma juy acekawĕn ceweju.

— Ikĕrĕat kuĝ mabuk ĕn — i'ĭmĝu juy ace wuywebe ma. Ixe wuymuisusun soat taĝ idibim jewewuywuyap puxim. Imĕnpuye juy acekawĕn ceweju. ²³ Deus ja'ĕ daĝ e'em soat em. Te'e ĝu wuyetabut cekay. Wuyetabucap muwĕnuwĕn warara'acayĭ be. Imĕnpuye Deus xe acesop soat em iap cuy ajowiwi jĭjā. ²⁴ Ĝebum cuy ajop wuyewewekay wuyewebuywat am, wuykukpin wuyewewekuk am tak, xipan wuyewewekuk am tak. ²⁵ Pĭĝpĭĝpĭĝ oibu'un je'awerom aweromayĭ xe Deus eju kawĕnwĕnap'a be. Ixeyĭ buxim ĝu juy wuyju bit wuybu'un ĝu ajop je'awerom. Jewemucokcokcoĝ pit cuy ajop. Ĝaxĭn ma wuykukukat jajĕm. Ipiat supĭ'ajoat kĭyjobit'ĭmayĭ be. Xipacat pit je'ĝĭm ja'ĕ kayayĭ be. Imĕnpuye biĝ ma juy jewemucokcokcoĝ ajop.

²⁶ Kawĕn icĕmān wuyetaybit tomukadi wuyukpiwatpin

ma wuyju ikêrêat muğêğēm. Imên ibima, apên kuka ace ikêrêat muğêap teida am? Ka'uma ma. Wuywebewi ikêrêat uk pa'ore soat pe wuywebe. ²⁷ Imênpuye wuy-pararam cuy ajop apên paxi Deus je'e wuywebe iap puxim. Deus ipiat supi'ajoat kūyjobit'ūmayū be. Ipiat'ajojom ip jeedop daxa isopat pe—ipararuat pe Deus kay itakomaayū. ²⁸ Moisés a'ō kay kūyjobit'ūmayū o'yaoka ip kuyjeayū. Xepxepayū be, eba-pūğayū be dak “Teku ikêrêat muğêğēm” i'e buje, pūğ tağ ma ip i'e buje, o'yaoka ip. Itabotaidabotbot ġu o'e ip ixeyū kay, Moisés a'ō kay'um puye. ²⁹ Ixeyū buxim ġasū dak pūğpūğpūğ Deus ipot muymuy. Deus kuy juk jekawên o'ğuwên cebe ip.

— Okpot o'jedoyekereren eywebeam. Oe'ū eymuisun ojuy — i juk o'e cebe ip.

Inaka cekawên wayway ip.

— Apêğām oe'ū? Ekpot tak ikêrêat mujurūğrūğ'ukayū jo'i osunuy — i napa ma e'em ip Deus pe.

Deus biōğbuk xe ikukpin ip. Inaka ibiōğbuk muymuy ip. Moisés muymuy'ukat podi ma Deus muymuy'ukat ipiat supi'ajojo, ixeyū bodi ma ikêrêat mujurūğrūğ puye. Karēm ip ipiat supi'ajojo.

³⁰ — Ōn ma oceweik — i juk o'e Deus. — Ōn ma apên cuk adi oekuku ip iaptei oteida webekitkiyū be — i juk o'e. — Xipacat oğm xipacat mujurūğrūğ'ukayū be — io'e. — Kūyjobit'um ip pima, ipiat osupi'ajoat cebe ip imukūyjo am — io'e Deus. — Kūyjobit pima bit ip, ōn ma ipiat osupi'ajoat cekay itakomaayū be — io'e.

Wuyetaybit imên Deus cuk o'e iam. ³¹ Deus soat em itait. Ixe be ipiat'ajoat puje, iparara jġjā je'e ip cekay ixē muymuy'ukayū.

³² Ğebum pit cuy epesop apên cuk adi kuy bima epekukuku iap kay. Kuy bima juk Deus ekawên epeya'ġjojo. Ixe biōğbuk kuy oōm eywebe. Ade em

itabut'ūmayū juk adi ipiat o'sup'i'ajojoat eywebe. Inaka eybu'u ġu epesop Jesus kay ipiat'ajojom ma'ġu eyju. ³³ Pūġpūġpūġ eyju'in eymuymuy'uk ip osodop. Adeayū etabun cuk adi ikērēm eykuk ip. Ade em cuk adi ipiat o'sup'i'ajojoat ip eywebe. Eybu'u ġu a'ġu epesop eybureyū badipta am. Eyparara ġu juk adi epesop eyaokaap puxim. ³⁴ Daomūnmūnap'a beayū jom tak cuk adi epeku ibuywat am ip. Itabut'ūmayū be eybubut tujupa'um puje, eybu'u ġu a'ġu epesop eyetabut am Cristo kay. Eycokcok acā a'ġu epesop.

— Ijodiap podi ma xipacap opop ocewebeam — i a'ġu epe'e. — Ibo ikoro jeedop soat em — i a'ġu epe'e. — Soat em ibo kuġ ajop — i a'ġu epe'e.

³⁵ Ġasū dak cuy eya'ōcam epesop. Eya'ōca bima, xipacat cuy epejat. ³⁶ Eyukpiceġēm ġu juy epesop Deus bikuyap taġ eyeku am. Ixe bikuyap taġ eyeku buje, xipacat epejat apēn ixe juk adi o'e'e iap taġ. ³⁷ Imēn e'em Deus ekawēntup:

Ġaxīn ma omuykuiat jajēm, i. Ibun ġu jajēm, i.

³⁸ Webekitkiyū bit itabut jeedop cūġayū, i. Imēnpuye soat em itait jeedop ip oxe, i. Jetabucap epere buje bit, ocokcok ġu oce cekay, i.

Imēn e'em Deus ekawēntup. ³⁹ Wuyju bit wuyetabucap acepere ġu. Ipiat'ajojoap kay ġu wuyju bit cum. Oitabidaoiat puxim ġu wuyju—jetabun o'jepereiat puxim ġu. Wuyetabut ma. Deus tak wuydaxijom.

11

¹ Deus kay wuyetabut pima wuyetaybit cīcā wuyemu-muwiwi acejat iam. Deus kay wuyetabut pima: — Ġasū wuyju ijojom ġu iap ġuyjom acejojo — i wuyju e'em wuyewewebe.

² — Xipat cĩcã eyju oxe — io'e Deus kuyjeayũ be, itabut ip cekay buye.

³ Wuyetabut cekay bima wuyetaybit Deus ja'õbi ipi o'ğujurũğ iam. Wuywebe ijo but iap o'ğugẽ Deus. Wuywebe ijo ba'orean soat o'ğugẽ.

⁴ Deus kay itabut osunuy Abel. Imẽnpuye ixemumuĩm Caim emumuĩm podĩ ma xipat osunuy Deus xe.

— Cũğ ma ĩn oxe — i juk o'e Deus cebe, itabut jekay buye. — Emumuĩm xipat oxe — i juk o'e.

Wuyju ģebum pima apẽn Abel itabut osunuy iap kay, "Itabucat cũğ ma Deus xe" i wuyju e'em. Imẽnpuye Abel e'ũ buje dak puk wuymutaybitbin ma itabucat cũğ ma Deus xe iam.

⁵ Deus kay itabut osunuy Enoque. Imẽnpuye oe'ũ ģu. Deus ixemumuĩn ma o'tujuu jewekay. Ibureyũ ixemumuĩn o'tobuxik ģu, Deus kuy o'tujuu buye. Deus icokcok osunuy ixemumuĩn ekukuap kay i'e'em Deus ekawẽntup. ⁶ Wuyetabut'ũm pima, Deus imucokcok pa'ore wuywebe. Wuyju Deus kay bima, wuyetabun cuy ajop Deus kake iap kay; Deus xipacat mũmũm jebikuyap tağ jeku pin cĩcãayũ be iap kay dak.

⁷ Deus kay itabut osunuy Noé. "Ipi juayũ oğũ'ũm idibim soat" i'e buje, Deus ekawẽn kay itabut osunuy. Muba'at puk o'jojojo ģu. Inaka itabut osunuy Deus ekawẽn kay. Kobexixi o'ğugẽ jebekitkiyũ daxijo am. Kũyjobit ģu osodop ip warara'acayũ ipi juacayũ Deus a'õ kay iap ibapuk cĩcã o'e, Noé kũyjobit puye. Imẽneju:

— Cũğ ma ĩn oxe, etabut okay buye — io'e Deus cebe.

⁸ Deus kay itabut osunuy Abraão. Deus pe jenaẽ buje, kũyjobit osunuy ya'õ kay. Deus a'õbi jeka bewi o'jẽm itaybit ģu ma'ğũ apoma oju iam.

— Ijop eipi oceipiũm ewebe — i juk o'e Deus cebe. Ibo eipi kay o'ju. Ģuyjom je'ğũm cebe iap eipi kay o'ju.

⁹ — Ijop eipi oğũm eipim — io'e Deus cebe.

Ibo eipi daḡ oeku powatwat puxim. Paḡo muḡēḡē'a be osunuy tūyap ḡu buk puye. Torojō'a be osunuy jekpot eju—Isaque eju. Jenaxeḡebit eju dak osunuy—Jacó eju.

— Ijop eipi oḡūm eyipim — io'e Deus cebe ip—Abraão be, Isaque be dak, Jacó be dak. ¹⁰ Deus emukamuweḡūnka wiwim osunuy Abraão—Deus emukamuḡēka wiwim—ika'ūm'ēm'ūmatka wiwim.

¹¹⁻¹² Itabut osunuy Abraão Deus kay. Aypa o'e. Ce'ūat puxim jetayxi mu'ukreḡ pa'ore osunuy. Je'ū ojuy kuy osunuy. Sara dak yabut o'e—Abraão tayxi. I'ita ba'oreat osunuy. Inaka Abraão itabut osunuy Deus a'ō kay.

— Soat em Deus ja'ō daḡ e'em — io'e jewebe ma. Imēnpuye itayxi o'ḡu'ukreḡ yabut ma'ḡu. Ipotpet o'e Abraão. Ade jījā ip osodop ixē naxeḡebitbit. Imuweḡūn pa'ore osodop ip kasopta buxim, ka'oririt puxim tak.

¹³ Jetabut cīcāp kuḡ ma ip oe'ū'ū—Abraão, Isaque dak, Jacó dak.

— Ijop eipi oḡūm eyipim — i mo a'ḡu o'e Deus cebe ip. Inaka ibo eipi o'jat ḡu ip. Imēnpit:

— Ijop eipi Deus je'ḡūm ocenaxeḡebitbit pe apēn ixē o'e iap taḡ — io'e ip jewebe ma.

Ipi o'jat ḡu ip. Inaka icokcok ip osodop jetabucap kuḡ.

— Powatwat acā oceju — io'e ip ibo eipi watwat pe. Wara'at ka kaykaykay ma ip osodop.

— Eykadujukapkam acā oceju — io'e ip cebe ip. Ibo eipi bit o'jat ḡu ip. ¹⁴ “Eykadujukapkam acā oceju” i'e'e'ukayū jeka kudadam mabuk ip. ¹⁵ Yaḡuyepit ḡu osodop ip kuy bima o'jēm ip iatka kay. Yaḡuyepit pima kuka juk iba'ore ḡu o'e cepit am ip. ¹⁶ Wara'atka kay bit ip osodop yaḡuyḡebu. Kuy o'jēm ip iatka bodi ma xipat iboka. Kabi beatka kay ip osodop yaḡuyḡebu. Imēneju Deus isūsūn ḡu o'e cebuxim ip, “Deus ebekitkiyū oceju cekay ocetabut puye” io'e ip cebe buye. Deus o'sukamubapuk ikam ip.

¹⁷⁻¹⁸ Deus kay itabut osunuy Abraão.

— Ekpon oğüm ewebe — i mo a'ğu o'e Deus cebe. O'kap Abraão ipot. Isaque i ipot putet osunuy.

— Isaque ipotpoyũ acã enaxeğebitbiyũ oxe—warara'acayũ bit ka'ũma — i mo adi a'ğu o'e Deus Abraão be. Inaka:

— Ekpot cuy eyaoka impik am wetabun — i mo adi a'ğu o'e Deus Abraão be okukpin cĩcã paxi iap co am.

“Ekpot cuy eyaoka” i'e buje, Abraão kũyjobit o'e Deus a'õ kay. Isaque aoka ojuy o'e.

¹⁹ — Iba'ore ğu Deus pe waram Isaque'ũm mutait am — io'e jewebe ma Abraão.

Inaka Isaque o'tujupit jeduk'a be, “Eyaoka ğu juy” io'e Deus puye. O'tujupit jeduk'a be ce'ũap tomukadi waram o'jetait'iat puxim.

²⁰ Deus kay itabut osunuy Isaque. Imẽnpuye:

— Ğuyjom Deus xipacat je'ğũm eywebe — io'e Jacó be, Esaú be dak.

²¹ Itabut osunuy Jacó dak Deus kay. Je'ũ pinpin puje: — Deus cuy xipacat je'ğũm eywebe — io'e José ipotpoyũ be.

— Soat podi ma ěn xipat — io'e Deus pe jektokta'ip kuğ.

²² Itabut osunuy José dak Deus kay. Je'ũ pinpin puje: — Israel naxeğebitbit jeejẽm Egito eipi bewi — i mo adi a'ğu o'e. — We'ũap tomukadi ojebit cuy epetujowat oka be imõğ ãm witabikũy be — i mo adi a'ğu o'e jekpotpoyũ be.

²³ Itabut osodop ip Deus kay Moisés ebay, ixi dak.

— Judeuyũ ipotpoyũ juy epeyaoka ikap'isum ma — i juk o'e Egito eipi kukukat—Faraó o'e.

Imẽnpit iparara ğu osodop ip ipi kukukat puxim—Faraó buxim. Kũyjobit'ũm osodop ip ixẽ a'õ kay Moisés ebayũ. Ebağũğ kaxi ikap'isuat munẽmnẽm'uk ip osodop yaokaap puxim. O'ğunẽm ip idip cĩcã cexe ip puye.

²⁴ Itabut osunuy Deus kay Moisés tak. Yaypan puje ibu'u o'e Faraó daxit'in. Jebadipyũ kay pin o'e.

— “Faraó daxit'it ên”, i'ũmġu juy epe'e owebe, i juk adi o'e Egito eipi watwat pe.

²⁵ Ibu'u osunuy ikêrêat muġê ãm jemucokcok am—pũġ kabia dak ka'ũma. Ibu'u ġu bit osunuy ipiatpi'ajo am jebadipyũ eju—Deus ebekitkiyũ eju. Ibu'u ġu osunuy ipiatpi'ajo am Deus mucokcok am.

²⁶ — Soat tarekrek kuġ pima kuka ocokcok oce—Egito eipi beat kuġ pima — i juk o'e jeweweju ma. — Deus emunaẽ mucokcokap ojuy owebe ipiatpi'ajoat puje bit, ibodi ma kuka ocokcok oce — i mo adi a'ġu o'e jewebe ma. — Ģuyjom Deus kũyjobicaptei je'ġũm owebe — i juk o'e jewebe ma.

Ibodei buap wiwim cĩcã osunuy soat em ma.

²⁷ Itabut osunuy Moisés Deus kay. Imẽnpuye o'jẽm Egito eipi bewi. Ipi kukukat etakomaap puxim jeparara pibun ġu o'jẽm Egito eipi bewi. O'jẽm Deus kay itabut cĩcã buye. Deus cocomap puxim oekukuku ijojom ġu ma'ġu.

²⁸ Itabut osunuy Moisés. Imẽnpuye apẽn kũyjobit'ũmayũ muy'ũ'ũ'ukat o'kap iap epeta o'ġubapuk Deus a'õbi. Pás-coa i peta butet.

— Ovelha doy juy epetoymõġ eyduk'a esũġtabi daġ kũyjobit'ũmayũ muy'ũ'ũ'ukat pe eyekpot muy'ũap puxim—koapat muy'ũap puxim — i juk o'e Israel naxeġebitbit pe.

²⁹ Itabut ip osodop Deus kay Israel naxeġebitbit Moisés ixeyũ kukukan pima. Imẽnpuye iodi o'timudek ip ipipurukat taġ. Ixe di butet “Tipakpukati” i osunuy. Egito eipi watwat pit timudek ojuy bima, soat ip oap. Oakõm ip. Ka'ũma ma o'jepoyat.

³⁰ Itabut osodop ip Deus kay Israel naxeġebitbit Josué ixeyũ kukukan pima. Imẽnpuye Jericó ka ekorara o'jedu.

Duuuuo. O'jedu 7 kabia ika koreren ceku buje ip. ³¹ Itabut osunuy Deus kay Raabe dak yapoan ma'ġu osunuy. Josué ebekitkit o'ġuōm jeduk'a be imunēm ān yaokaap puxim. Jericó ka jom oajēm'iyū o'ġunēm. Imēnpuye Deus pe ja'ō kay kūyjobit'ūmayū aokaat puje, Raabe o'yaoka ġu ip Josué ebekitkiyū.

³² Deus kay itabut ip osodop warara'acayū dak. Inaka o'e ġu owebe itabucayū muwēn ām eywebe: Gideāo muwēn ām eywebe, Baraque dak, Sansāo dak, Jefté dak, Davi dak, Samuel dak, Deus ekawēn muwēnuwēn'ukayū dak. ³³ Itabut cīcā osodop ip Deus kay. Imēnpuye wara'at tiwatwat eju nopaġōġōm ip o'e. Ade jījā o'yaoka ip. Cūġ ma oekuku ip Deus etabutpe. Imēnpuye Deus cebe iūm ojuy iap o'jat ip. Deus leāo o'tūymuymūġ jekay itabucat oap puxim. ³⁴ Waram pima Deus daxa yoboġat o'ġupirēm jekay itabucayū aokaap puxim. O'jenapōn ip pajam jaokaap puxim. Ya'ōbaca'ūm ip osodop. Ya'ōbacaan pit o'e ip Deus a'ōbi. Ade jījā o'yaoka ip itakomaayū nopaġōġōm pima. Ade ma dak o'ġuypōġpōġpōġ ip powatwat esorarayū. Soat kaka daġ owatwatwat ip. ³⁵ Itabut Deus kay osodop ip aoyū. Imēnpuye Deus waram ixeyū ipotpoyū'ūm'ūm o'ġutait.

Warara'acayū be itakomaayū ipiat o'supi'ajojoat. Oe'ū'ū'ū ip ipiat pibun. Inaka Deus o'jomuymuy ġu ip jaokaap puxim.

— Oce'ūpi ġu — io'e ip. — Oceparara ġu oce'ūap puxim — io'e ip.

Waram acejetait iap wiwim osodop ip. Soat em wuyetait acesop Deus xe iap wiwim osodop ip. ³⁶ Warara'acayū itabucayū o'jowaywayway ip adedeayū etabutpe. Warara'acayū o'yukxabiokaka ip ixemuġġēġēbum yabi be icaat pum. Warēmtaġ ma o'ġuōmōm ip daomūnmūnap'a be. ³⁷⁻³⁸ O'yabuġbuġ ip wita'am. Ipidase o'ġuweka ip

kede'am. Pajam tak o'yaoka ip. Tadaybot ma oekuku ip. Mēmē xee kuḡ oekuku ip jedotim, cabra xee kuḡ tak. Itabut'ūmayū juk adi ipiat o'supi'ajojoat ixeyū be. Warēmtaḡ cīcā juk adi ixeyū o'jukukuk ip. Kaokokat puxim osodop ip itabut'ūmayū xe. Deus xe bit soat podi ma xipat osodop ip itabucayū.

— Teyūku ikērē jījā — io'e ip itabut'ūmayū ma.

— Eyju soat podi ma xipat oxe — io'e Deus pit cebe ip. Cenapōnat puxim uk'a'ūmat taḡ oekuku ip, co'a daḡ tak. Jeduk'a be ḡu osodopdop ip—witabikūy be acā.

³⁹ — Xipat eyju oxe eyetabut cīcā okay buye — io'e Deus soat pe ixeyū be. Inaka ijodi bima Deus cebe ip iūm ojuy iap o'jat ḡu ip. ⁴⁰ Deus kuyayū kay ā ḡu osunuy ḡebum. Wuykay dak osunuy ḡebum—ixeyū'ūm'ūm nomujuacayū kay dak. Soat ḡu o'ḡūm ja'ō daḡ kuyayū be. Soat pit je'ḡūm ja'ō daḡ jekay itabucayū be—kuyje itabucayū be—ḡasū itabucayū be dak, ḡuyjom itabut je'e iayū be dak. Soat je'ḡūm pūḡpūḡ pepepe ma. Soat taḡ wuymuisun je'e kuyjeayū muisunap puxim.

12

¹ — Ocejū ma juk adi ocetabut cīcā ocesop Deus kay — i'e'em wuywebe soat ixeyū kuyjeayū. — Eyju dak eyetabun cīcā juy epesop cekay — i'e'em ip wuywebe. Daudau'ukayū buxim wuyju. Daudau'ukat ipoxiat epereperem jewūnca i'e am. Imēnpuxim ikērēat mujurūḡrūḡap cuy acepere Jesus a'ō kay am. Pa'orem ḡu wuyju ikērēat mujurūḡrūḡ. Ikērēat mujurūḡrūḡ pima wuybu'u wuyetabut am Jesus a'ō kay. Daudau'ukat taobu'u ḡu jedaudauap epere am. Ixe buxim wuyju dak wuybu'um ḡu juy ajop Jesus a'ō kay am. ² ḡebum cuy ajop Jesus kay! Ixe ma juk adi wuymutabun. Ixe dak wuybuywatwan jeenuy wuyetabucap epereap puxim.

— Korosa be ġu juy oje'ũ — i'ũmġu juk o'e. — Warẽmtaġ cĩcã ip okuk — i juk o'e jewebe ma. — Inaka korosa be dak obu'u ġu we'ũ ãm — i juk o'e. — Ğuyjom ocokcok oġuy webay xe bima, ixẽ bikuyap taġ cuk adi ojekuk buye — i juk o'e jewebe ma.

Oibu'un ġu je'ũ ãm korosa be warẽmtaksuġ ma'ġu ip o'jukuk. Imẽneju ġasũ xik'i omuy Deus xe. Deus eju nuynuy soat kukukan.

³ Ğebum cuy epesop apẽn cuk adi ixẽ Jesus ipiat o'supi'ajojo iap kay. Itakoma jĩjã ip osodop cekay ikẽrẽat mujurũgrũġ'ukayũ. Iboap kay juy ġebum epesop eyetabut am eybu'u'up puxim, eyetabucap epereap puxim tak.

⁴ Ikẽrẽat muġẽġẽ'ukayũ mukorẽmrẽm cĩcã juk adi epesop. Imẽnpuye juk adi ipiat o'supi'ajoat ip eywebe. Inaka eyaoka ġu buk ip. ⁵ Deus kawẽnwẽn eywebe apẽn cebayũ kawẽnwẽn jekpotpoyũ eju iap puxim. Kawẽnwẽn eywebe eya'õmucan am. Imẽn ixẽ e'em:

Okpot, emukũyjobit am wuykukukat ipiatpi'ajoan ewebe bima, eya'õpicũġ cuy eġuy ya'õ kay, i. Emukũyjo am ixẽ be emukorẽm puje dak, eġuycũġ ġu juy eġuy, i.

⁶ Wuykukukat ipiatpi'ajoan jewe ikukpinayũ be cũġ ma jekuap ojuy, i. Jekpotpoyũ mukorẽmrẽm imukũyjo am ip, i.

Eyaġuyba'ũm tu iboap ekawẽn kay? ⁷ Eyetaxim cuy epesop ipiat'ajojom pima. Ipiatpi'ajojom pima:

— Wuyebayat ipiatpi'ajoan ocewebe ocemũkũyjo am cũġ ma wuyekuap ojuy — i juy epe'e eyewewebe.

Deus wuyukorẽmrẽm pima, wuyetaybit Deus wuykuġ jekpotpoyũ kukap puxim iam. Soat wuyju ipiatpi'ajojoan wuy'ipotpoyũ be cũġ ma ip cekuap ojuy.

⁸ Imukorẽmrẽm'ũm pima wuyetabi kuka ace ite ipocat iap kay.

— Ekpocat tu ite? — i kuka ace cebay be.

Deus tak ipiatpi'ajojoan soat pe jebekitkiyū be imukūyjobit am ip. Imēneju eymukūyjo am eywebe ipiatpi'ajojoan'ūm pima, Deus ipotpocayū ġu eyju. ⁹ Ijodi ixeyū be wuymukorēm puje dak, ibuyxim ma wuyebayū ajukuk. Ixeyū a'ō kayap podi ma juy kūyjobin ajop wuyebayat a'ō kay—kabi beat a'ō kay, wuykay aġat a'ō kay. Ixe a'ō kay kūyjobit pima, soat em acesop cexe wuyetait. ¹⁰ Wuyebayū ma ipiatpi'ajojoan wuywebe wuymukūyjobit am. Ipiatpi'ajojoan ip wuywebe ipiatpi'ajoat pin osodop ip puye. Darem ma ip wuymukorēmrēm. Deus pit ipiatpi'ajojoan wuywebe xipan wuykuġap tomuju. Ixe ipiatpi'ajojoan wuywebe soat taġ wuymuisun am. Ipiatpi'ajojoan wuywebe soat taġ wuyisu jejo'i am. ¹¹ Wuywebe ipiatpi'ajoan pima, wuycokcok ġu wuyju—wuyġuycūġ acā. Ġuyjom pit cebay be imukorēm'ibiyū cedaġ ma jekukum, kaba'ūm tak ip warara'acayū eju.

¹² Imēneju iġuycūġayū juy epesubuywan. Jetabucap kay ibu'u'uayū juy epeya'ōmucan waram icokcok i'e am ip. ¹³ Cūġat e daġ cuy epeku warēmtaġ ma eyekup puxim.

¹⁴ Kaba'ūm cuy epesop soat eyxeayū kuġ. Soat taġ eyisum cuy epesop. Soat taġ wuyisu'ūm pima, wuykukukat acejojo ġu. ¹⁵ Deus ibikuy xipan wuykuk am. Imēnpuye jewebuywatwan cuy epesop eybu'uap puxim Deus pe emumuūm pu am. Kadai icupat jexeat muy'ū'ūm. Imēnpuxim pūġ ma ey'inat jetabut am ibu'u bima, jebureyū dak kuka o'ġubu'un. Imēnpuye jewebuywatwan cuy epesop eybu'uap puxim, eyetabucap epereap puxim. ¹⁶ Jewebuywatwan cuy epesop Deus a'ō kay kūyjobit'ūmap puxim, aoyū kaykayap puxim tak. Esaú ekuap puxim ġu juy epeku. Esaú kūyjobit'ūm o'e Deus a'ō kay. Jecokcokap kay acā o'e ġebum. Koapat osunuy cebay ipot. Cebay e'ū buje, soat ma kajuk o'jat jebay'ūm pubut,

ixe koapat puye. Inaka:

— Pũğ pratom exat'in eğũm owebe — io'e jekitpit pe.
 — Ën ma juy soat ejat wuyebay e'ũ buje oxat teim — io'e jekitpit pe. — Odieğ Deus xipan jekuk koapat kukap puxim oxat teim — io'e cebe.

¹⁷ Koapat peam tak cebayũ kawẽnwẽn'uk osodop Deus eju kuyjeayũ.

— Xipan cuy okpot ejukuk — i'e'e'uk osodop ip Deus pe.

— Owebeam tak cuy ecekawẽn Deus eju — io'e Esaú jebay be. — “Xipan cuy okpot ejukuk—koapat ejukuk,” i juy ece cebe — io'e Esaú.

— Iba'ore owebe ġasũ bit — io'e cebay bit. — Ekitpit peam kuy juk iboam oce Deus pe — io'e.

Jewa'õmuwarurun pa'ore o'e Esaú be cedağ ma jeku am. Cũğat e dağ jepit ojuy jĩã o'e. O'tõn iğuycũğ puye. Inaka cepit pa'ore o'e cebe cũğat e kay, kuy kũyjobit'ũm o'e buye.

¹⁸ Co'a jeje Deus jekawẽn muwẽnuwẽn pima, iparara jĩã osodop ip Judeuyũ—kuyjeayũ. Oajẽm ip co'a ikibi be. Sınai'a ikibi be oajẽm ip—wuyecoanpucat'a ikibi be. Daxa isop iğo'a akokoreren. Kabidaudau dak oeku. Kabiok tak oeku diğ. Kabidoxixi dak oeku iğo'a dağ. ¹⁹ Parasuy jo'iat a'õ o'ya'ĩjojo ip. Deus a'õ dak o'ya'ĩjojo ip. Ixe a'ĩjojo buye, “Ecekawẽn ġu juy ocewebe” io'e kuyjeayũ jeparara pibun.

²⁰ — Epeyeu ġu juy co'a kay — io'e. — Eyõhõyũ dak cuy epeğuyuat ġu — io'e. — Ceu pinat cuy epeyabuğbuğ wita'am — io'e. — Ojopi eywebe soat pe — io'e cebe ip.

Imẽnpuye iparara jĩã ip o'e Deus a'ĩjojoayũ. ²¹ Ipararuat o'jojojo Moisés.

— Õn ma okarabakbak oce oparara pibun — io'e co'a dağ pima.

²² Eywebe Deus jekawẽn muwẽn puje bit, eypararam ġu epesop. Kuy epesot wara'at'a kay co'a kay. Sião'a

kay epesot Jerusalém ka beat'a kay. Kuy epesot Deus ka be—soat em itaicat ka be—Jerusalém ka be—kabi beatka be. Tak ġu ip Deus ekawēn tojtjtot'ukayū dopdom iġo ka be—ade jġjā ip. Imuweġūn pa'ore wuywebe ade jġjā ip puye. ²³ Kuy epesot Deus ebekitkiyū kay—koap itabucayū kay. Awerom ip dopdom Deus ka be. Icocok cġcā ip ibutet ibararak opop kabi beatup pe buye. Kuy epesot Deus kay. Ixe apēn cuk adi oekuku ip ipi ju bima iap ideida soat pe ipi juacayū be. Xipacat je'ġūm cūġayū be. Ipiat supi'ajoat kūyjobit'ūmayū be. Kuy epesot cedaġ ma jekuku'ukayū'ūm'ūm piōġbuk kay—soat taġ o'ġuisun'iaiyū'ūm'ūm piōġbuk kay. ²⁴ Kuy epesot Jesus kay. Ixe juk kawēn iisuat o'ġuwēn wuywebe. Ixe o'jedoyekereren wuywebeam. Apēn Abel o'jedoyekerereniap kay ġebum pima “Eġuweik cuy iwaġo be yaokaap tei” i wuyju e'em Deus pe. Apēn Jesus o'jedoyekerereniap kay ġebum pima bit, “Ġasū bit ēn ikēreāt uk'uġ ocewebewi soat pewi” i wuyju e'em Deus pe.

²⁵ Imēneju:

— Kūyjobin ġu ace Deus a'ō kay — i'ūmġu juy epe'e. Ijodi Moisés Deus ekawēn o'ġuwēnuwēn kuyjeayū be. Kūyjobit'ūm ip osodop. Imēnpuye Deus ipiat o'supi'ajojoat cebe ip. Ġasū bit kabi bewi ma Deus jekawēn muwēnuwēn wuywebe. Kūyjobit'ūm pima kuyjeayū bodi ma kuka ipiat acesupi'ajo. ²⁶ Sinai'a jejewi cekawēn puje, ixe ja'ōbi ipi o'ġuyxixixi. Ġasū bit waram o'jekawēn wuywebe.

— Waram pukto ipi oġuyxixixi — i'e'em wuywebe. — Kabi dak oġuyxixixi — i'e'em. ²⁷ — Waram pukto — i juk adi o'e. Imēnpuye wuyetaybit jemumuġē ma ġuyxixixi iam. I'uk'uk je'e ip Deus emumuġē soat. Imuyxixixi'ūmayū acā jeedop ip jenuyap pe ma.

²⁸ Deus soat kukukan pima, wuykukukan tak jeenuy. Ixe a'ôbacaap mu'üm pa'ore soat pe. Imëneju:

— Soat podi ma ën xipat — i juy ace Deus pe. — Soat podi ma ën a'ôbaca — i juy ace cebe.

Ixe bikuyap tağ cuy ajeku. Ibuyxim cuy ajukuk. Wuypararam cuy ajop ixex buxim. ²⁹ Ixe kay acã wuyetabut—Deus kay acã. Daxa soat mu'ümap puxim ixex dak ja'ô kay küyjobit'ümayü ġu'üm.

13

¹ Eybu'um ġu juy epesop ikukpin eykitpitpiyü kuk am—Cristo ebekitkiyü. ² Powatwat cuy epeğuôm eyduk'a be. Xipan cuy ip epejukuk. Püğpüğpüğ kuy juk powatwat o'ğuôm jeduk'a be. Tüybe teyüku powatwat iãn o'e ip. Imënpit Deus ekawën tojotjot'ukayü ma juk o'ğuôm ip—kabi watwat. ³ Ğebum cuy epesop daomünmünap'a beayü kay eyju dak cexex epesop iap puxim. Ğebum cuy epesop ipiat'ajojomayü kay eyju dak cexex ip epesop iap puxim.

⁴ Ibuyxim cuy ibumünmënat ajukuk. Warara'acat ewebumün puje juy ibuyxim cuy ip epejukuk. Eytayxi'ümat eju ġu juy epeyepo—eytayxi eju acã. Eyektop'ümat eju ġu juy epeyepo—eyektop eju acã. Deus ipiat supi'ajoat warara'acat itop eju jepopo'ukat pe warara'acat tayxi eju jupopo'ukat pe dak.

⁵ Dinheiro kay jÿjã ġu juy epesop.

— Õn pit jeyiwat ġu—püğ em tak ka'üma — i'e'em Deus wuywebe. — Õn pit jeyepere ġu—püğ em tak ka'üma — i'e'em wuywebe.

Imënpuyex eycokcoğ cuy epesop ajo eyju ikuğiat kay.

⁶ Imënpuyex wuya'ôcam cuy ajop.

— Wuykukukat wuybuywatwan soat em — i juy ace warara'acat pe ipararaayü be. — Wuypararam ġu juy

ajeku — i juy ace cebe ip. — Ijodiat o'e ġu kuka wuywebe — i juy ace cebe ip.

⁷ Ġebum cuy epesop kuy bima eykukukayū'ūm'ūm kay. Deus ekawēn cuk adi o'ġuwēnuwēn ip eywebe. Ġebum cuy epesop apēn cūġ ma ip oekuku iap kay, apēn ip jetabucap kuġ oe'ū'ū iap kay dak. Ixeyū'ūm'ūm puxim eyetabun cīcā juy epesop. ⁸ Soat em Jesus Cristo iwaruru ġu e'em. Ibit ma. Kuy bimaap co'i ma ġasū dak omuy. Ġuyjom tak imēn ma je'e. ⁹ Eybu'um ġu juy epesop kawēn icēmat taġ jeku am. Iwarum eymutaybitbin'ukayū a'ō kay ġu juy epesop cūġat e daġwi eyjēmap puxim. Pūġpūġ jewaġuyġuy ip i'opi paxi sujop owebe iap kay. Ibuywatwan ġu ibo bit biġ ma itabut am ip Jesus kay. Wuyju bit cuy ġebum ajop Deus soat em xipan wuykuġ wuya'ōmucanucan iap kay. Iboap kay ġebum pima, biġ ma wuyetabut acesop Jesus kay.

¹⁰⁻¹¹ Paīyū wūnca ēn'in i'o'o'uk osodop ip o'suēnmupikupik ip ien'in torojo'a be kapikpik'ukayū. Ġasū bit i'opi o'e cebe ip wuyju Deus pe iūmūmat'in. Pūġ kabia be bit paī yoboġat ōmōm badiat'abi be—Deus tūytūyap ibuyxi jījāat'abi be. Wūnca doy dujuōmōm toy mubapuk am Deus etabun Deus pe ikērēat ukap ojuy. Ibiat ēn pit i'opi paī yoboġat pe. Ibiat ēn tujowatwan ip jedopdopap etakobe imupik am. ¹² Imēnpuxim Jesus o'jedoyekereren wuywebewi ikērēat uk am. O'jedoyekereren jekay itabucayū muisun am soat taġ. Itabut'ūmayū juk adi warēmtaġ ma ixē o'jukuk. Ixē oe'ū ikaboġatka etakobe. ¹³ Ixē oibu'un ġu je'ū ām korosa be warēmtaġ ma'ġu ip o'jukuk. Ixē buxim wuyju dak wuybu'um ġu juy ajop ixē bikuyap taġ jeku am warēmtaġ ma'ġu ip wuykuġ itabut'ūmayū. ¹⁴ Wuydopdopapka ijodi ġu. Ikakoro ġu ijodiatka. Ġuyjom jeedotka wiwim wuyju. ¹⁵ Imēnpuye:

— Ĕn soat podi ma xipat cĩcaã — i wuyju e'em soat em Deus pe.

Wũnca mupikupik'uk'ũm ma'ġu wuyju Deus etabun. Jesus tak kawẽnwẽn Deus eju wuywebeam.

— Ĕn ma soat podi ma xipat cĩcã — i wuyju e'em soat em cebe. — Ĕn acã ocekekukat — i dak wuyju e'em cebe soat em.

¹⁶ Xipacat muġẽġẽap cuy epeyepere ġu. Jewebuywatwacap tak cuy epeyepere ġu. Imẽn Deus epeġucokcoġ wũnca ũmũm cebe iap puxim.

¹⁷ Kũyjobin cuy epesop eykukukayũ a'õ kay. Ixeyũ a'õ epeya'õxik ġu juy. Apẽn cuk adi eykuk ip iap cuy ġuwẽn ip Deus pe. Imẽnpuye ibu'u ġu ip eybuywat am. Aġ ip eykay eyetabucap epereap puxim. Eyju ixeyũ a'õ kay bima, icokcok ip jeybuywatwan. Eyju kũyjobit'ũm pima bit, iġuycũġcũġ je'e ip. Ibo bit jeybuywan ġu.

¹⁸ Epeyepere ġu kawẽġap Deus eju ocewebeam. Soat em oceju cedaġ ma oceku pin Deuse tabun. Imẽnpuye:

— Xipat paxi oceju Deus xe? — i'ũmġu oceju e'em. Oceletaybit ocebinũnpe ma oceju cũġ ma cexe iam. ¹⁹ Biġ ma juy epeyekawẽn Deus eju ġaxĩn ma ixbe be waram omuypit am eyjo am.

²⁰ Wuykukukat Jesus itabucayũ kukukat yoboġat ovelha kukuk'ukat puxim. Deus ixbe Jesus o'ġutait ce'ũap to-mukadi. Waram ġuto o'jetait. Imutait puje:

— Kawẽn iisuat taġ cuy epeku ġasũ bit, okpot o'jedoyekereren eywebeam puye — i juk o'e wuywebe. — Kawẽn iisuat taġ eyeku buje, soat em oxe epesop eyetait — i juk o'e Deus wuywebe.

²¹ Deus wuyaġuymubabibin'ukat. Ya'õbacaap kuġ'ũm pima, ibikuyap taġ wuyeku ba'ore wuywebe. Imẽnpuye ixbe soat xipacat cuy je'ġũm wuywebe. Ja'õbacaap cuy

je'g̃ūm wuywebe ibikuyap taḡ wuyeku am soat em. Jesus Cristo a'ōbi soan cuy je'e wuywebeam jebikuyap taḡ.

— Ĕn ma soat podi ma edipap kuḡ — i juy acece soat em Jesus Cristo be.

Imēn cuy acece cebe.

²² Okitpitpiyū, itedup otupmubararak eymu-cokcoḡaptum. Tup ade ḡu otupmubararak. Imēnpuye eyukpiceḡēm ḡu juy epetupco. ²³ Wuykitpit Timóteo o'ḡujēm ip daomūnmūnap'a bewi iam eyetaybit pin òn. Ĝaxīn ma okay yajēm puje, otujowat cuy oweju, eyjom oju buje.

²⁴ Oceju kato mujujum eykukukayū be—soat pe—Jesus a'ōkayayū be. Eykitpitpiyū dak kato mujujum eywebe—Itália eipi watwat.

²⁵ — Bay, xipan cuy ebekitkiyū ejukuk — i òn e'em Deus pe.

Ibūrū ma.

Deus ekawẽntup Kawẽn iisuat ekawẽn
New Testament in Mundurukú (BR:myu:Mundurukú)

copyright © 2010 Wycliffe Bible Translators, Inc.

Language: Mundurukú

Translation by: Wycliffe Bible Translators, Inc.

Mundurukú [myu], Brazil

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mundurukú

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06
